

東
華
續
錄

東華續錄

咸豐七十八

臣王先謙敬編

臣陶潛宣恭校

咸豐八年戊午春正月己卯諭內閣蔣霽遠奏參提督擁兵株守請革職畱營等語貴州提督佟攀梅自上年三月到任以後擁眾數千株守麻哈州城官兵在高規地方打仗失利距該州僅三十餘里該提督次日尙未得知已屬形同聾瞶且經該撫屢催拔營與總兵巴揚阿會同剿賊膽敢藉詞延宕當此軍務喫緊之際似此遷延貽誤實屬咎無可辭佟攀梅著卽革職仍畱軍營差遣委用以觀後效儆再不知愧奮卽著從嚴參辦○庚辰諭軍機大臣等英桂奏南路剿匪及光固喫緊各情請飭舒保會剿並暫畱過境吉林黑龍江餘丁一摺河南大頂山股匪疊經官軍痛剿其南

竄棗陽一股合併楚境黃草坪一帶土匪亡命搶掠復經兵勇截擊回竄唐縣邊界之晒山等處見在豫境之唐縣桐柏及楚境之隨州棗陽山路叢雜本有匪徒出沒若再被該匪踞險負隅按捕殊形棘手英桂已飭德楞額會同邱聯恩進剿尙恐未能得力舒保帶兵見駐襄陽著官文胡林翼飭令該營總就近移兵由隨州棗陽與河南將弁前後夾擊以期盡掃匪蹤至六安霍山及光州所屬之地方均有賊匪滋擾需兵甚急所有赴楚補額之吉林黑龍江餘丁四百名見在路過許州著英桂暫行截留以資助剿俟東路軍情稍鬆仍飭該餘丁赴楚補額將此由六百里各諭令知之○甲申諭軍機大臣等本日文煜奏江南軍餉浮濫太多等語江南糧臺濫支濫應歷年已成錮習前據和春等奏兵勇糧餉支放比例未符朕因大軍直薄金陵剋期收復是以准其暫行照舊

辦理以示體恤至統兵大員以及帶兵將弁自應遵照定例支領
毋許仍前浮濫文煜辦理糧臺照例支放本屬正辦乃各營員弁
竟有糾眾毆官之事總因前此彭玉雯等辦理不善致成積重難
返之勢殊堪痛憾著各該大臣等嚴加約束毋許借端生事何桂
清駐紮常州如有不肖員弁滋鬧糧臺卽著文煜稟商該督就近
懲辦其兵勇口糧見因金陵指日成功暫准照舊支發但思克復
金陵之後尙須分兵進剿若遽加裁減恐不足以資鼓舞著和春
等俟金陵克復先將不受約束之兵遣撤歸伍其素有紀律堪用
以追剿者應如何酌量調劑之處著何桂清豫爲籌畫或於例餉
之外籌備賞需交該大臣等將奮勇各兵隨時鼓勵無功不得濫
邀庶於體恤之中仍存限制此係朕格外施恩原因功在垂成不
惜小費並非遂爲定例該大臣等屆時曉諭兵丁使皆知感知奮

淨埽逆氛以慰朕望何桂清身任封圻地方一日早安則民氣一日早復但期於事有濟則權宜應變之處帑項並非虛糜將此由六百里諭知和春張國樑許乃釗何桂清並傳諭文煜知之○乙酉諭內閣本月十四日 祈穀壇大祀前經降旨朕親詣行禮茲因骸疾尙未如常恐升降拜跪不足以昭誠敬著派恭親王奕訢恭代行禮先期在紫禁城內齋宿前一日詣 壇齋宿屆期朕仍在宮內敬謹致齋○諭勝保等奏連破賊圩擊散竄匪等語捻首劉狗卽劉大淵於渦河兩岸之鄧家集等處負嵎抗拒黑旗捻首梁思任在喬家廟等處添築兩圩經侍衛伊興額等督率馬隊截殺殆盡將梁思任擒獲正法兵勇乘夜進攻賊圩餘賊逃竄史榮椿迎頭截擊捻首劉狗被追乞降亦經殲斃其藍旗回竄股匪經候選知府倪元灝等追剿斬獲極多餘匪逃散此次攻破鄧家等

圩賊巢擒斬擒首藍旗回竄股匪亦被擊潰散勦辦尙爲得手著
勝保等督飭將弁實力接捕務將餘孽殲除淨盡俾地方一律肅
清所有出力員弁兵勇著勝保等查明保奏○諭軍機大臣等勝
保袁甲三奏進攻六安分援固始請派兵助剿一摺粵匪分股北
擾意圖牽掣我軍勝保駐紮三河尖扼其北犯之路該逆攻撲固
始縣城勢甚披猖勝保等見抽撥兵勇一千五百名交樂善等帶
往固始兵力旣分自宜量爲添調惟陝甘官兵於湖北凱撤時曾
經勝保截畱見在該省官兵恐未能再抽調二千名之數本日已
諭令樂斌酌量調撥矣前諭英桂飭令德楞額格綳額等帶領馬
隊由新息一帶馳赴勝保軍營諒已遵照辦理此時勝保等進攻
六安分援固始需兵甚急河陝汝匪蹤業已殄除著英桂仍遵前
旨前往陳汝駐紮以爲勝保等後路聲援毋稍遷延致滋貽誤將

此由六百里各諭令知之○諭勝保袁甲三奏隨營兵力不敷調
派請飭於固原甘州西甯河州提鎮標內選撥馬步精兵二千名
赴皖協剿所奏自係實在情形該省存兵能否如數調撥著樂斌
察看情形酌分勁旅遴選得力將弁管帶迅赴勝保等軍營以資
剿辦將此由六百里諭令知之○丙戌諭軍機大臣等王慶雲奏
探聞貴州思南失守請移鎮遠州兵剿辦兼顧川疆一摺貴州思
南府城於十二月初五日失守尙未據蔣爵遠奏報亟應派兵剿
辦以免蔓延蔣玉龍業經簡授貴州提督見尙駐紮鎮遠著卽統
所部川兵從銅仁松桃繞出思南之北相機進剿規復郡城毋令
匪徒久踞該處教匪滋事地方文武何以未能堵禦輒被攻陷著
蔣爵遠查明參辦其毗連思南等處應如何設法堵剿以杜竄越
並著督飭各該文武嚴密籌辦毋稍疏懈其畱駐鎮遠弁兵卽著

該撫會同蔣玉龍派委妥員接管至思南接壤川疆業經王慶雲飭委知縣李漸鴻總辦酉秀邊防並令副將鄒鸞章派兵扼截龔灘要隘卽著嚴飭該員弁等實力防守其未盡事宜並著隨時布置毋令匪眾竄入川境是爲至要將此由六百里各諭令知之○庚寅諭軍機大臣等前因豫省桐柏等處匪蹤未淨諭令官文等卽飭見駐襄陽之營總舒保移兵隨棗一帶會剿本日據英桂奏豫省匪徒經德楞額邱聯恩等於泰山廟等處疊次剿殺餘匪回竄角子山數已無多並經汝甯府督同州縣擒斬匪首多名舒保一軍可毋庸前赴隨棗惟固始縣城被圍危急粵逆捻匪數至五萬城中兵勇太單勝保所部兵勇旣須扼守三河尖有不能抽撥之勢英桂見擬親往該處而馬隊不滿三百步隊亦止二千仍恐不敷援應著官文胡林翼卽飭舒保速帶馬隊兼程赴豫逕往光

固一帶實力救援俟固始解圍光州情形稍鬆再令回駐襄陽以資控扼英桂見已飭令德楞額抽帶馬步兵勇先往著卽親督大兵隨後繼進其截留吉林黑龍江餘丁准其一併帶往俟軍務稍鬆仍令赴楚所有角子山餘匪卽責成邱聯恩實力搜捕阜陽教匪卽飭陳州汝甯等府分投堵剿毋令闖入豫境將此由六百里各諭令知之○以克復江西臨江府城賞道員劉于溥按察使銜副將田興恕巴圖魯名號餘升擢有差○予陣亡教諭何堯臣等祭葬世職○予江西陣亡知府周炎祭葬世職附祀其父周玉衡祠○癸巳軍機大臣等會同戶部兵部議覆葉爾羌參贊大臣慶英奏南路換防官兵擬請變通自咸豐八年爲始分作六年抽換以節經費應如所請辦理惟防兵經費不費於防所而費於程途往返一切開銷故前會議新疆兵制案內令該大臣等或改防爲

眷或招募充補防所多募一人內地卽少派一兵積少成多久之
換防兵丁自可減少於經費方有裨益仍應令該大臣等實心實
力講求招募爲永遠節省經費之計從之○雲貴總督吳振械奏
回民就撫辦理已有端緒惟漢回忿爭不已燒殺相尋就撫一局
深恐又有變更得旨應撫者自撫違抗者必剿固可並行不悖勿
憂其局有變更惟在曉諭得宜方能潛消反側○甲午 上幸圓
明園○乙未諭軍機大臣等何桂清趙德輶奏曉諭夷酋照常貿
易等語英夷闖入廣東省城本應令各海口絕其貿易念此次起
釁係由葉名琛剛愎自用駕馭失宜以致該夷忿激滋事是以暫
緩用兵疊次諭令柏貴等如果退出省城尙可寬其既往備負固
不悛卽調集兵勇驅逐出城再與講理上海華夷旣無嫌隙自應
照常通商何桂清等派蘇松太道薛煥諭以粵事應歸粵辦又因

佛英等國有至天津請派大臣另議通商之語並飭薛煥告以已
另派大員前赴廣東辦理措詞尙屬得體俟黃宗漢路過江蘇該
督等與面晤可將此次入奏情形告之至上海時有火輪船往返
並著密探隨時具奏將此由五百里密諭知之○丙申諭內閣上
年因米價昂貴八旗生計維艱降旨散放賑米以示體恤見當青
黃不接之時米價尙未平減若將賑米放至二月卽行停止恐不
足以資接濟著加恩再行展賑三箇月仍由戶部撥給米石交各
該旗酌量戶口多寡分別散放並著查旗御史會同各該旗都統
副都統輪往監視覈實辦理用示朕恩賞疊沛至意○丁酉諭軍
機大臣等勝保袁甲三奏固始獲勝並圖取六安各情一摺逆眾
圍攻固始縣城勢甚披猖袁甲三馳抵尖鎮後卽經勝保親赴戴
家店激勵兵勇聯絡鄉團與城內官軍悉力夾擊雖得勝仗尙未

大挫賊氛並恐解圍後或西竄闌入光商復有蔓延之慮李孟羣
因麻埠喫緊未能馳往會勦著英桂先飭德楞額等馬步隊迅速
前往該撫卽親自帶兵並所募練勇隨後繼至毋再遲延並著勝
保密飭張曜設法固守力保危城不得稍有疏懈其六安一路著
袁甲三就近控馭務將州城攻克以期次第掃除醜類將此由六
百里各諭令知之○湖南巡撫駱秉章奏聞廣東洋人將將軍巡
撫送回撫署派兵監守收繳省城各標及近城各團軍器省河礮
船亦歸洋人統帶並分守城門出示則洋酋與將軍等會銜奏入
上諭黃宗漢迅速馳往○命翟誥開缺爲候補按察使仍留湖
南辰永沅靖道任以李承恩爲廣西按察使由右江道遷○以安徽兵
練勦擒擒匪攻毀趙屯鄭圩賊巢出力賞知州孫供金花翎練總
文生苗沛霖五品銜選用知縣花翎餘升擢有差○戊戌諭軍機

大臣等李孟羣奏援剿固始情形請飭催兵餉一摺李孟羣軍營餉需前諭四川山東分別籌撥其四川之餉由湖北先行墊解山東之餉由河南先行墊解以期迅速本日復諭戶部將前撥該藩司兵餉飭催自可陸續解到見在固始被圍緊急李孟羣派往兵勇係爲兼顧豫疆起見著英桂就近籌撥接濟毋使匱乏候山東解到餉銀即可劃還至撥解軍火及限行文報例准應付之項向應由地方官撥夫遞送派差押護儻鄰省州縣於經過時敢有玩誤卽准李孟羣查參其辦理妥速者亦准酌量保奏並著該藩司通飭各州縣不得遲延貽誤至另片奏請調黑龍江吉林馬隊該二省見已無可調撥前經勝保奏調未經允准著毋庸議伊興額馬隊自攻破鄧圩後毫境尙有餘匪亟須搜剿勢難兼顧該藩司俟固始解圍後將各兵勇調回爲數不少如必須馬隊可就近與

勝保通融辦理將此由六百里諭知英桂並傳諭李孟羣知之○
己亥諭軍機大臣等連日疊據勝保等奏固始被圍喫緊並李孟
羣奏請飭催餉銀當經諭令英桂撥兵赴援卽親自督兵繼進並
先行籌餉解赴李孟羣軍營諒已遵照辦理固始城圍未解李孟
羣派援兵勇雖多未知接仗能否得力英桂馳抵汝郡後著卽酌
度情形先其所急多派兵勇與勝保會合夾擊迅解固始之圍至
阜陽等處土匪滋事沈邱項城所屬地方已被竄擾亟應嚴密防
剿除飭該管地方文武並候補知府蒯賀蓀督勇堵扼外仍當遴
派得力將弁前往剿辦毋令蔓延其甘肅赴皖官兵一百八十四
名准其暫行截畱以資助剿惟此係福濟等奏補缺額官兵未便
久畱豫省著俟陳汝情形稍鬆卽行飭赴安徽軍營將此由六百
里諭令知之○庚子以團練出力永廣湖北沔陽孝感江陵隨文

武學額各三名江夏武昌興國黃陂黃岡蘄水麻城黃安均棗陽
南漳鍾祥天門京山安陸應山應城各二名大冶咸甯蒲圻嘉魚
蘄羅田松滋枝江監利穀城宜城光化潛江雲夢各一名○辛丑
諭內閣前因喀什噶爾英吉沙爾回城先後失陷諭令法福禮將
各該城文武各員有無畏葸逃避禦侮不力及守卡弁兵何以漫
無覺察之處就近詳查具奏茲據法福禮奏稱喀什噶爾總兵伊
綿阿等督兵迎剿接仗十七次領隊大臣巴哈善等登城守禦卡
倫弁兵來城者係因報信及幫同守城尙非有意退避英吉沙爾
文武各員亦均能固守及與賊接仗奪獲器械有據賊匪並非由
該處卡倫闌入守卡弁兵尙無不合等語該二城文武各員及弁
兵等既查無畏葸逃避及禦侮不力等情均著免其置議其因何
起釁著俟究出實情並各該管大臣有無失察貽誤之處會同扎

拉芬泰一併具奏○壬寅頒 硃諭三載考績所關甚鉅滿漢諸

臣有能夙夜精勤才堪肆應者允宜甄敘茲屆京察之期吏部開

單題請朕詳加披閱大學士彭蘊章協辦大學士戶部尙書柏蔭

吏部右侍郎穆蔭工部左侍郎杜翰贊襄樞務矢慎矢勤大學士

裕誠宣力有年靖恭在位閩浙總督王懿德攘外安內布置咸宜

均著交部議敘湖南巡撫駱秉章籌畫軍務能任賢才克臻安謐

著賞加頭品頂帶餘著照舊供職○予安徽陣亡縣丞曹綬卿等

祭葬世職○甲辰官文都興阿胡林翼奏 臣等欽奉 諭旨派兵

出境迎剿卽飭調九江步軍三千名駐紮襄陽舒保馬隊二百名

馳赴麻城羅田一帶嗣接稟報舒保先期移紮麻城距襄較遠而

楚豫交界之隨州棗陽久爲豫匪窺伺 臣等已咨行署提 臣訥欽

等加意防範並酌留舒保馬隊百名協同扼守以資策應刻下楚

軍水陸馬步全抵江皖急切未能遠征實因九江功在垂成上游重鎮攸關尤當奮力攻擊迅圖收復臣等擬俟九江得手除分援江省外其餘楚軍專力豫皖先清長江北路以防竄越前此調來之吉林黑龍江西丹如訓練得力亦當爲豫皖助征之用再皖逆屢圖上犯正月初一二等日太湖逆眾數千乘我兵度歲之隙竄近蘄州邊界當派道員唐訓方會合各路兵勇分投擊退初七日宿松股匪又竄近蘄州邊界之荆橋等處築壘抗拒臣都興阿飭鮑超等嚴密防守並派多隆阿帶領馬步各隊分路進攻斃賊甚眾餘逆奪路狂竄我軍追至太湖城邊沿途殺賊四五百名生擒三十餘名十一日進剿桃花鋪等處賊巢我軍分三路直前該逆抵敵不住沿山逃竄追殺三十餘里斃賊一千餘名惟據獲賊供稱太湖渡船口石碑等處約計賊七八萬人連營三十餘里臣等

仍激勵將士奮勉圖功務期剋日會合皖軍盡殲醜類 上諭軍
機大臣等見在勝保等援剿固始雖屢獲勝仗尙未解圍仍須添
兵助剿舒保此時諒已起程惟所帶馬隊僅二百名不成一軍著
官文等酌量情形添撥步隊相輔而行或卽於駐紮襄陽兵內酌
撥千名交舒保統帶前進較爲得力太湖宿松逆匪竄近蘄州經
都興阿等督兵迎剿斬獲頗多惟探聞太湖渡船口石碑等處尙
有賊黨七八萬連營三十餘里逆勢如此猖獗非下擾金陵卽上
竄楚境著都興阿督飭各軍相機截剿務將此股逆匪迅速殲除
九江功在垂成何以尙無捷報不勝殷盼見在和春等正在圍逼
金陵安慶蕪湖等處賊黨尙多時往金陵援應所望九江早克順
流而下與江南大軍兩路夾攻使該逆不至他竄方爲妥善著官
文等傳旨令楊載福彭玉麟等奮勇圖功毋得遷延時日坐失機

宜將此由六百里諭令知之○加放八旗兵餉○免從征台吉扣
繳借支俸銀○乙巳 上還宮○諭軍機大臣等本日據伊興額
奏擒匪踞擾蒙宿一帶請飭調馬隊助剿並以蒙宿軍情喫重不
能遠赴太和等各等語藍旗擒匪竄擾蒙宿一帶復句結劉大淵等
敗匪由太和折回窺伺宿徐渦河南北伏莽亦漸有蠢動亟應嚴
密堵剿以固徐境藩籬見在附近蒙宿一帶並無大員可派帶兵
俟史榮椿自亳州帶兵前來該侍衛即可與面商機宜協力督軍
進剿至請調馬隊一節江南相距較遠江北見在圍攻江浦喫緊
前經勝保奏請調撥據德興阿等以無可分撥覆奏李孟羣因援
剿固始請調復諭以如果必需可就近與勝保通融辦理今該侍
衛所需馬隊俟固始解圍後其能否分撥之處卽著勝保酌量辦
理見在賊勢歸併蒙宿如果太和不甚喫重所有朱連泰一軍亦

可前往蒙亳會剿勝保遠在固始一時未能得信卽著袁甲三會同史榮椿就近酌度情形先行調度務將蒙宿賊巢一律掃蕩如賊匪被剿竄往他處史榮椿伊興額等卽當追蹤剿捕不得以保守徐境遂爲了事將此由六百里諭知勝保袁甲三並傳諭史榮椿伊興額知之○丙午以廣東布政使江國霖捐輸軍餉永廣四川大竹縣學額一名○是月賑安徽潁州等六府州縣災民平糶江西南昌等十四縣倉穀貸山西平定等十八州縣清水河等二廳並陝西鎮安等五縣被災地方籽種口糧蠲緩江西義甯等二十四州縣被災新舊額賦緩徵直隸開州等六十六州縣被雹新舊額賦並給開州等六州縣被災旗民口糧緩徵山東臨清等六十二州縣德州等四衛被災地方本年額賦

二月丁未朔以恭進 玉牒 上詣乾清宮行禮○戊申諭內閣

晏端書奏懇恩將截留漕米暫緩籌補等語浙江杭嘉湖三府屬各州縣因災蠲緩截留六年分漕米六萬石其撥抵緩帶正耗米三萬六千九百九十七石零應俟本年秋後徵還歸於下屆搭運所有咸豐六年因災蠲免正耗米二萬三千二石零一時籌補維艱著准其援照江蘇上屆成案暫緩籌補仍著晏端書督飭司道籌款再行買補搭運以重倉儲○諭軍機大臣等本日據史榮椿伊興額奏捻眾北趨圍攻營盤鈔截餉道請由山東派撥曹州鎮兵五百名助剿並撥餉銀數萬兩以資接濟一摺見在藍旗捻匪由六安竄回蒙宿各旗捻匪亦均陸續投入渦河南北伏莽紛起史榮椿等馬步各隊止有二千餘人賊眾兵單殊形束手前已調到兗州官兵五百名仍屬不敷分剿著崇恩再撥曹州鎮兵五百名一併交史榮椿調遣以資協剿惟曹州人情浮動本地亦不宜

空虛仍著該撫酌調他處營兵至曹彈壓方爲妥善至餘營糧餉
匱乏並著崇恩就近於山東省籌撥銀四五萬兩派委妥員解赴
史榮椿等軍營以資接濟將此由六百里諭令知之○庚戌諭軍
機大臣等福濟奏廬州巢湖新造戰船官兵勇每月鹽糧需費
甚鉅請飭陝西每月準撥餉銀二萬兩以濟要需其餘欠皖餉一
百五十餘萬兩請在兩淮欠解甘餉二百四十餘萬兩內就近劃
抵皖省欠款卽以陝西積年欠皖之餉撥補甘省等語見在安徽
水陸各軍攻剿正當喫緊之際軍餉勢難刻緩著曾望顏按月撥
銀二萬兩解赴福濟軍營應用並著何桂清卽由兩淮欠解甘餉
內劃撥一百五十餘萬兩就近陸續解皖以資接濟應解甘餉卽
以陝西積年所欠皖餉由曾望顏就近陸續解甘作抵其兩淮見
派委員何祖望領解續撥甘餉二萬兩並准福濟截畱亦畱陝西

抵撥歸款將此由五百里諭令知之○諭福濟奏皖餉缺乏請飭
河南省再撥漕糧接濟一摺據稱皖省各路軍營每月需餉銀十
餘萬兩各省協款撥解寥寥見在六安捻匪勾結粵逆紛竄廬舒
等處剿匪正當喫緊兵勇口糧不繼必須就近接濟豫省短欠皖
餉爲數甚鉅該省漕糧除先後截撥十三萬石外約計尙有餘漕
四五萬石可抵欠款著英桂將此項漕糧截畱廬州軍營並著援
上年成案按照時價折變實銀毋庸搭解寶鈔以濟軍食將此由
五百里諭令知之○福濟鄭魁士奏據署廬鳳道黃元吉稟報捻
首龔得有往攻固始之信蘇添幅及張落刑等尙在六安州城見
句結各捻分路北竄擬由廬郡壽州定遠竄擾等語查臨淮係北
路要津設該逆竟由壽州定遠竄逸則廬郡後路可慮逆匪詭譎
異常聲東擊西是其慣技廬城重地不可不嚴密防範而六安以

東路徑分歧直通定鳳與廬城相隔非遙臣魁士駐廬兵勇值此
髮捻分乘未便輕動必須示以鎮定俟該逆出竄卽由閒道疾馳
迎剿臣福濟駐扼店埠四路策應並派副將塔思哈督同遊擊阿
克敦等帶領兵勇星夜馳往壽六交界之余家集等處相度形勢
扼要紮營復令道員李元華督率練勇協同堵禦何處緊急卽向
何路進剿一面嚴飭黃元吉帶領兵勇分守水陸各路兼顧正陽
壽州門戶以扼北竄仍相機奮力攻取六城並飭六安州知州茅
念劬督同都司吳天成帶勇進逼州城密約內應乘賊眾乏食之
時設計離間以期攻克至北路蒙城太和亳州等處捻眾糾合韓
狼子劉狗餘黨在渦南淝北到處蔓延臣等止此兵力實有鞭長
莫及之虞已咨勝保就近督飭史榮椿等分派兵勇相機剿辦報
聞○辛亥 上幸圓明園○諭內閣勝保袁甲三奏固始剿賊獲

勝並籌攻六安州城一摺逆匪圍攻固始節經勝保督兵痛剿大受懲創猶敢恃其賊援眾多悉力抗拒正月十八日該逆於東南城偷窺地道轟塌城垣數丈經參將張得勝等施放連環槍礮傷黃衣老賊一二百名勝保親帶馬隊巡歷西路嚴陣以待二十五日賊分三股出集我軍分爲兩翼礮斃賊匪極多賊勢退卻我軍合力追擊殺斃無算其東路逆匪經營總楚勒剛阿等督兵乘勢橫截殲斃二百餘名賊仍遁入土壘逆匪經此番痛剿其膽已寒著勝保激勵將士乘勢進剿迅解城圍○諭軍機大臣等勝保等奏固始剿賊獲勝並請飭催援兵一摺固始縣城被圍已久情形實屬危急英桂旣於正月十八日由葉縣啟程此時當已早抵汝甯所帶兵勇自以赴援固始爲要豈可遠駐汝城致成株守著英桂卽帶馬步各隊星速前進會同勝保攻剿卽一時不能親往亦

著將德楞額等馬隊迅速派赴固始其截畱赴楚餘丁並著一併飭令先赴勝保軍營該撫卽隨後繼進見在勝保力疾督兵鏖戰而英桂徒事遷延儻有疏虞惟該撫是問至該撫既有分股繞犯商城之語則西路亦應嚴防光州一路僅有馬隊百名尙嫌單薄並著英桂會同勝保妥籌策應勝保前此請調陝甘官兵據樂斌正月二十二日所發奏報已於陝西提標及漢中陳安延綏各鎮派兵一千名甘肅提標及涼州甯夏二鎮派兵一千名剋日啟程卽著勝保沿途催提此項官兵未到以前務就見有兵力迅解城圍毋令日久變生又形棘手至龍澤厚一軍及李孟羣派來兵勇本應歸勝保調度如有援剿不力觀望推諉者卽著從嚴參辦毋稍瞻徇其六安之賊以大股併入固始則城中必已空虛卽著袁甲三商同李孟羣設法攻取及早收復俾官軍不至互相牽制是

爲至要將此由六百里各諭令知之○勝保奏河南尉氏縣地方拏獲捻首李兆受家口設法羈縻得旨梟獍之性難以理喻必須專意離間使其自相殘殺○予河南陣亡侍衛富順等祭葬世職○壬子諭內閣和春奏攻剿金陵賊匪疊獲勝仗一摺金陵賊匪因大兵直逼南路秣陵關糾集皖北捻匪四出滋擾潛襲營盤意圖分我兵力正月初三日該逆於北面太平神策兩門突出悍賊數股並由下關乘駛礮船分犯水陸各營張國樑親督副將張玉良等分路迎擊都司賴鎮海等統率水師沿途夾擊鏖戰三時殲斃逆匪二三百名生擒數名餘眾覓水而逸十二日該匪復於下關擁出二千餘眾太平神策等門復出賊三股兜鈔其東南隅七橋壘賊匪同時出撲張玉良等分兵兩路迎敵並飭舟師水陸夾攻副將馮子材手刃黃衣賊目一名連殪數賊太平門續出悍匪

千餘副將余兆青等首先迎勦張玉良馮子材各帶所部轉戰直前賊勢大潰約計殲斃四五百名其東北各路並七橋壘之賊疊經張國樑等派兵截擊殺斃無算南路之賊自正月初五至十六日復由殷巷祿口谷里村等處分路出撲經總兵傅振邦虎坤元等派兵分投擊勦斬馘不可勝計郭家莊等處賊卡並已一律踏平餘賊全行敗退逆匪經此次痛勦勢已窮蹙著和春等嚴飭將士奮力環攻先將秣陵關克復以次進逼金陵城垣毋稍延緩○諭德興阿奏圍攻江浦擊退援賊大獲全勝一摺金陵賊匪渡江應援江浦糾結皖境烏江匪徒在石碛橋地方添紮營壘德興阿派令成明富明阿會同博奇烏爾恭額等銜枚疾進分隊圍攻儘先遊擊王希堂協領博奇營總舒通額身先士卒射斃黃衣賊目生擒偽應天侯等多名立將石碛橋賊壘踏平成明等伏兵山谷

誘賊出戰賊疑援至由西門出千餘人接應官軍一鼓前進賊眾紛紛敗退經副都統富春等督隊橫衝追至城濠復斃賊百餘名此次擊剿援賊大獲全勝著迅將江浦縣城克復掃蕩江北逆黨以期速克金陵毋稍延宕○諭蔣蔚遠奏教匪闖入思南府城一招據稱上年十二月十四日有教匪數千人於思南府距城四十里地方肆行焚掠該署知府福魁督同文武帶兵奮勇出城剿捕因眾寡不敵又值城中火起兵勇驚潰該署府被傷殉難經歷鍾策勳等同時陣亡匪擁入城旋即退出盤踞滋擾等語此次貴州思南府城被擾前經王慶雲探聞奏報已有旨派貴州提督蔣玉龍統帶所部川兵相機進剿卽著督同貴州兵練迅速撲滅毋任久踞○諭軍機大臣等和春奏糧臺大員辦事拘泥懇請另簡一摺江南糧臺兵餉浮支濫領日久相沿前據該大臣等奏請量予

加增朕以其功在垂成若遽復舊例恐懈軍心業經降旨暫允所請文煜總辦糧臺循守例案原爲慎重錢糧未可責以更張好事然如該大臣所奏弁兵未能深悉眾議沸騰亦於軍情有礙自未便仍畱總辦致有齟齬所有江南糧臺著何桂清揀放妥員接辦固不可如文煜之過涉拘泥亦不得因弁兵挾制漫無稽查總期大功速成則費少而省多朕亦不以例禁相繩若日久耽延豈能不加以裁抑前降諭旨甚明諒該大臣等必能仰體也至文煜前奏放餉月分劃清界限係爲報銷時易於覈算並非將舊欠概行停止該弁兵等何以妄生疑謗以後應如何辦理之處著何桂清督飭接辦之員酌覈妥辦其湖南營兵張世瑚恃眾抗違本應卽行正法旣據該大臣奏明尙無毆官糾眾之事著免其一死卽照所擬發落嗣後仍當嚴明約束毋使弁兵恃眾滋事致干咎戾將

此由六百里各諭令知之○諭李孟羣奏籌辦六安剿匪情形並請濟餉撥兵一摺該藩司派赴固始援剿兵勇前已諭令英桂就近籌畫接濟俟山東解到餉銀即可籌款英桂接奉此旨諒已遵照辦理山東餉銀三萬兩前據崇恩奏稱業經照數起解此時計已到豫則赴固兵餉當可無虞缺乏李孟羣存營兵勇尙有六千餘名所需兵餉疊據英桂奏稱撥銀五千兩官文奏稱撥銀一萬兩均於正月初旬起解四川省先撥餉銀一萬兩道經楚省官文並未截畱此後四川撥餉卽接濟該藩司軍餉至楚省派舒保赴麻城防堵原有步隊三千餘名赴援光固之兵據奏止帶馬隊二百因其不成一軍已諭官文酌添步隊千名相輔而行此時舒保當已帶兵前進矣該藩司見帶兵勇爲數尙不爲少著卽照所請督同將弁認真勦辦先清一路之賊能將六安克復再圖進取與

勝保會合則兵力較厚互爲聲援奏功自易也○命文煜來京以

王有齡爲江蘇布政使薛煥爲江蘇按察使

由蘇松太道遷

○雲南鶴麗

鎮總兵官余萬清以病免○予貴州陣亡知府福奎等江甯陣亡

遊擊張成伍等祭葬世職○癸丑諭譚廷襄嚴防山東海口○甲

寅諭內閣勞崇光奏克復南甯府城一摺廣西南甯府城於上年

八月十五日克復曾經葉名琛奏報已經降旨令該督責成該鎮

道速將永瀆橫州匪黨認真剿辦茲據勞崇光奏該鎮色克精阿

該道吳德徵於郡城失事之後督率弁兵會同團練即將城池克

復尙知愧奮仍著責令乘勝剿捕肅清匪黨如果始終不懈再行

奏請加恩此外出力各團並著該撫查明請獎○諭軍機大臣等

前因俄羅斯欲請勘定分界特派奕山與該國使臣普提雅廷會

議嗣因久無折回確信未經勘辦上年冬間英佛稱兵占踞廣東

省城復欲赴上海議事而普提雅廷忽於米夷照會內附呈咨照
軍機處清漢文及夷字各書其中袒護英佛已飭理藩院行文該
國薩訥特衙門據理曉諭令其無庸干預矣惟所稱分界地址自
沙斌嶺起至阿爾管什勒喀等河止迤東地方人皆不知興安嶺
並非直達東海不能分作兩國邊界應以黑龍江左岸爲俄羅斯
邊界中國滿漢人等悉移右岸又欲將烏蘇哩河下游右岸入海
河汊分作海岸卽以海岸分斷等語中國與該國分界以格爾畢
齊河興安嶺爲限定議百數十年從無更改今所稱興安嶺不通
東海難以爲界是並非不知當時所定界址特欲另闢一直達東
海之路以便其人船來往斷難遷就允准況黑龍江左岸均爲中
國打牲人等舊居如果早爲該國所屬豈能百餘年來並無爭競
直至今日始生異議據稱移居費用由該國供給其爲情理不足

而以利引誘顯然可見豈有數千里江岸可以貨取之理見在兩江總督何桂清等已將不能在上海會議之處行知普提雅廷如遵諭折回黑龍江卽著奕山據理辯論務當恪守舊約至精奇哩等處建房屯糧本屬非理乃稱業已有人居住卽欲據爲己有然則中國屯戶在右岸居住尤爲久遠何又輕言遷徙耶且稱願在伊犁地方分明界址其道里亦無從明晰惟有妥爲拒絕使知見在造房占住皆屬違例我國因和好有年不加驅逐但與之理論務當仍照前議將烏特河地方會同勘定卽將江岸居人速行撤去庶各守疆土永敦和好至文內嶺名河名是否係該國所稱名目係中國何嶺何江遇有報便詳查附奏所有該夷清字原文及繹出漢字文均著鈔給閱看○閩浙總督王懿德奏精神疲憊懇請開缺得旨卿仍應勉強支持慎自調攝○予廣西陣亡巡檢傅

勛等祭葬世職○乙卯諭軍機大臣等福興奏進賢撫州大股逆匪合犯東路見籌堵剿一摺廣信一郡爲江西完善之區逆匪久思窺伺見在進賢之賊已由鷹潭竄至楊林橋神元洞一帶山路叢雜處處可通河鎮若竟由南岸直趨則信郡必被滋擾其金谿賊匪亦糾合撫州逆黨由青田橋竄往泥灣雖經防兵擊退而賊眾兵單堵剿甚形喫重業經福興照會衢州鎮總兵饒廷選前往廣信河口一路堵剿著晏端書卽飭該鎮揀派勁旅趕赴廣信相機迎剿以固江浙門戶毋稍遲延至前調潮州鎮總兵壽山帶兵二千名赴援江西已於上年九月據葉名琛奏報飭令壽山取道福建汀州一帶前赴撫州爲時已久何以尙未行抵江西或該總兵已到撫州著福興耆齡派員迎探催提以便合兵攻剿見在援兵未集仍著該將軍督飭帶兵各員奮勇剿擊毋得專恃客兵致

滋貽誤將此由六百里各諭令知之○諭崇恩奏豫籌東洋防護
漕船事宜一摺據稱東省海口如蓬萊之廟島福山之罙文登
之威海榮城之石島俚島均係漕船往來必經之地防護最關緊
要該撫見飭令登州鎮督帶舟師於漕船入境時在洋面嚴密巡
緝惟近年閩廣艇匪往往隨漕北上尤須格外慎重東省在粵新
造廣船一時恐難趕到請飭令江南商局所置輪船隨漕北上等
語見在江浙兩省漕船業已開行洋面恐有疏虞必須妥爲護送
山東師船不敷分布著何桂清趙德轍卽飭令前派輪勇各船於
漕船北上時跟蹤護送並令到山東洋面巡緝以壯聲威至江省
護漕師船著遵照舊章飭令送至石島洋面交遞明白方准南旋
以重漕運將此由六百里各諭令知之○戊午申諭譚廷襄籌備
天津海防○己未諭軍機大臣等前據王懿德奏訪聞官錢局各

員舞弊漁利請旨從嚴革審當經批諭必有串通委員情事著從嚴訊究矣茲據御史陳濬奏閩省錢法壅滯物價昂貴民生日蹙推原其故皆由官錢局委員於銀價則高下任心票根則有無莫辨虛出虛入買空賣空以及虧短侵那種種弊端不可究詰其南臺官錢局管事人程松藻虧空敗露至四十萬串之多並有牽涉委員鍾俊等親幕通同牟利各情請飭嚴行查辦等語是該省官錢局舞弊果有通同委員情事若不從嚴究辦何以懲奸蠹而重度支著派東純會同王懿德慶端將此案人證親提嚴訊徹底清查嚴行懲辦知府鍾峻係該督撫保舉之員又據該御史奏稱係慶端幕友茲既被參舞弊營私王懿德等身任大員諒不敢心存回護自取咎戾著與東純秉公會訊定擬具奏王澍係王懿德幕友見在官聲若何並著該督明白具奏原摺著鈔給閱看將此諭

令知之○庚申諭內閣御前大臣軍機大臣會同刑部議覆陝西官錢鋪局委員舞弊罪名一摺各省設立官錢鋪局原以軍務未竣藉資協濟派委管理各員宜如何激發天良實心經理此案陝西官錢局委員已革知縣李應詔已革未入流李洵於官鑄鐵錢匿報至七萬餘串李洵復虧短鐵炭本錢五萬餘串之多官錢局委員已革知縣郭廷椿管理鋪事已革未入流王迎科那移官項夥開私鋪以致虧欠銀錢數逾巨萬均屬營私骫法喪心昧良據曾望顏訊明照監守自盜例從重定擬尙覺情浮於法李應詔李洵郭廷椿王迎科均著照載垣等所請於應得斬監候罪上從重卽行處斬以昭炯戒撤任陝西布政使司徒照之家人黃君任串通委員朋比分肥致令肆意侵那毫無忌憚若僅從重擬遣尙屬輕縱亦著照載垣等所請改爲絞監候入於本年秋審情實辦理

丁憂湖北知縣李應誥管事人路萬太明知委員匿扣局錢聽從指使狼狽爲奸均應從重懲辦李應誥著照議改爲革職發往新疆效力贖罪路萬太著照議改爲杖一百流三千里候補府照磨劉克健續派在局學習不能查出弊端又未將委員不容查問之處據實稟明著卽革職至司徒照以藩司大員攬斥道府獨任私人可惡已極於李應詔等通同黃君任種種舞弊三年之久豈能毫無覺察直至曾望顏查出弊端始以風聞詳稟雖未訊出婪賊入己情事謂非自圖立足其誰信耶本應卽照甘省成案立正典刑姑念其人本平庸稍與末減司徒照著革職發往新疆充當苦差所有李應詔李洵郭廷椿王迎科黃君任等五人應完賠項均由司徒照名下追繳勒限一年就近完清再行發遣逾限不完卽行送部監追其管理寶陝局之歷任鹽法道及官錢鋪造冊列銜

歷任西安府知府並承審此案之見任西安府知府沈壽嵩既據曾望顏聲明於局鋪事件向未與聞懇請免議所有失察處分均著免其查議嗣後無論京外有似此案情罪俱重者必應從嚴懲辦立予正法著追賠項俾見在京外局號大員委員吏胥等早知儆戒或自顧身家者不敢泯盡天良將此通諭知之○辛酉諭軍機大臣等前因福興奏撫州進賢賊犯東路當經諭令晏端書飭饒廷選派兵前往廣信迎擊並令福興等催提壽山援兵進剿本日據福興奏稱逆匪已竄踞河口鎮圖犯廣信其另股由湖防竄至鉛山該處與福建崇安縣接界並可東由廣豐入浙之江山縣境分竄旁竄在在堪虞見已飛咨耆齡及閩浙督撫撥兵防剿等語此股賊匪已竄至河口鎮廣信情形喫緊雖經福濟派令果勝等兵勇扼紮河鎮北岸兵力尙單所有耆英派出之濟勝彰武等

兵千餘名何以遲遲未到著卽飭令星馳赴援其潮州鎮總兵壽山援兵仍著福興耆齡迅速催兵前進福興見赴河鎮相機調度其饒廷選一軍已到玉山卽著晏端書飭令嚴防賊匪東竄並撥勁兵馳往廣豐以杜賊竄江山之路庶浙境可保無虞至另股賊匪蔓及鉛山並與福建崇安縣接界前據王懿德奏福建江西交界處所業已派兵防堵惟撫建賊勢方張廣東援兵又未見到情形危急著王懿德酌量閩省如有可調之兵卽派得力大員督帶一二千名或由邵武進剿建昌或卽由崇安取道前進與江西兵勇聯絡一氣以分賊勢見在江南圍攻金陵正當喫緊之際未必能分兵策應江西仍當由耆齡就近迅撥兵勇前赴鉛山一帶以資援應毋誤事機將此由六百里各諭令知之○諭前因固始被圍諭令英桂馳往救援嗣據英桂覆奏阜陽土匪分擾沈項擬卽

白武甯馳赴沈項一帶駐紮又據勝保奏馳抵固始已獲勝仗尙未解圍復諭令英桂迅速前進並先將馬隊及截畱赴楚餘丁飭赴固始並令籌保商城諒已遵諭辦理茲據給事中毛昶熙奏沈邱教匪不滿千餘皆饑寒烏合之眾不難平滅而固始爲河南門戶卽爲北路屏蔽該撫何不知緩急商城縣知縣戴鴻經庸懦退縮應卽撤任等語英桂督辦三省剿匪自應相度重輕先其所急見在沈邱等處教匪如尙未平該撫一面畱兵剿捕一面撥兵策應勝保速解固始之圍以防北竄並飭龍澤厚一軍迅速前進會同攻剿如有觀望卽行嚴參至戴鴻經業經勝保奏參革職見在尙畱本任當此嬰城固守之時未便驟易生手著英桂卽派幹員酌帶兵練前往幫同守禦如該員實係庸懦無能難期得力卽著撤參毋令遷就將此由六百里諭令知之○安徽巡撫福濟等奏

六安賊捻分股竄擾情形得旨捻眾兵單頗屬可慮若舒桐有犯
盧之舉不可盡調援軍致受牽掣設若兵隔於南賊直北犯咎將
誰執耶○于安徽陣亡縣丞胡長松等祭葬世職○壬戌浙江巡
撫晏端書奏逆匪窺伺廣信籌撥重兵分扼要隘得旨保障完善
之區固屬緊要然近防不如迎剿若有畛域之分信郡不守浙境
焉能獨全○賞內閣學士富呢雅杭阿副都統銜爲科布多幫辦
大臣○甲子諭內閣英桂奏督剿阜陽教匪獲勝見仍分兵追剿
一摺阜陽教匪王廷貞等分踞西盧等處竄擾汝陽新蔡各屬地
方經德楞額等督帶馬步兵勇分路進剿二月初七日至鍾莊地
方匪眾兩路鈔襲各有千餘我兵馬隊分兩翼截擊斃匪百餘名
初八日德楞額等先派馬隊將劉莊新莊李家盧三處匪巢要路
鈔住斷賊援應三路兵勇前進斃匪百餘名匪眾奔回西盧老巢

抵死抗拒適承惠督帶甯夏官兵立時趕到首先搶過賊壕官兵
齊登北柵施放連環槍礮火彈火箭齊發先將賊巢草棚然著賊
勢大潰我兵兩路一齊攻入計斃賊匪二千餘名西盧匪巢立時
平毀其東盧及劉莊等四圩賊眾紛紛逃竄賊巢一律焚燬辦理
尙爲得手著英桂卽飭德楞額等跟蹤追剿以期盡絕根株勿畱
餘孽在事出力員弁兵勇著查明彙奏奏請獎勵○乙丑諭內閣
勝保袁甲三奏力援固始疊獲大勝移營進逼賊壘一摺逆匪圍
攻固始疊經官兵痛剿本月初二日勝保督兵由北面進攻斃匪
數百名各軍乘勝追殺將東西兩路敗賊擊退回巢初六日勝保
督飭各軍進逼賊壘東岡又撲出大股賊二三千名經明慶等馬
隊鈔入生擒執旗悍賊並斃賊三百餘名初八日李孟羣等各軍
進剿固始西路殲賊無數逆眾敗退回巢時勝保由北路進攻賊

壘並令廣勇川勇等併力合擊生擒賊酋僞指揮陳得彬僞將軍
劉聚德等多名其固始城中官兵亦縋城下擊斃匪二百數十名
生擒僞師帥一名此次官軍疊挫兇鋒斬馘解散已及萬餘剿辦
尙屬得手仍著勝保督同李孟羣等併力攻剿迅解固始城圍其
馬隊出力官弁仍著勝保存記彙案保奏○諭軍機大臣等勝保
等奏固始續獲大勝並片陳商固賊勢緊急請飭催援兵等語昨
據英桂奏逆匪分竄商城當諭英桂若固始已解重圍卽以赴援
商城爲急見在勝保五戰皆捷兵威大振兼有李孟羣在宋集助
剿城圍不難立解但擒逆分竄商境勝保已無兵分撥著英桂卽
行帶兵赴援商城毋令賊勢蔓延至舒保已抵麻城何以疊經勝
保札催尙未趕到楚豫唇齒相依豈能稍分畛域著官文嚴飭舒
保仍遵前旨統帶馬步隊迅卽出境由光商進發以便沿途協剿

阜陽教匪業經斬馘數千並有德楞額追捕不難卽日蕞事見在
安徽兵勇在豫省者居多勝保軍營缺餉已久李孟羣援兵亦屬
需餉並著英桂督飭藩司瑛榮籌撥餉需源源接濟以期迅速奏
功毋得貽誤將此由六百里各諭令知之○丁卯諭內閣楊能格
奏軍需緊急請將本省錢糧照舊充餉一摺江蘇省江北各屬地
丁等項錢糧見在德興阿等進攻江浦餉需急關緊要所有淮揚
等各屬咸豐七年未完及八年分應徵地丁等款著准其援照前
案仍歸江北糧臺提充軍餉其江甯等處各標營當年兵餉著戶
部另行籌撥○諭軍機大臣等前因蔣玉龍已授貴州提督諭令
王慶雲於川省將弁內遴員前赴貴州接管該提督原帶川兵嗣
因思南府城被匪闖入復允王慶雲所請令該提督卽由鎮遠繞
出思南之北相機進剿本日復據王慶雲奏黔省桐梓等處匪徒

復熾應否卽由蔣玉龍一手勦辦等語蔣玉龍旣經簡放貴州提督全省軍務皆歸調度見在下游麻哈等處正當勦辦喫緊之際佟攀梅旣以貽誤革職恐該處統兵乏人儻王慶雲所派接替之員能卽日前往則桐梓匪徒卽可責成該員勦辦俾蔣玉龍得以回顧下游若由思南再至桐梓恐與麻哈都勻相去漸遠著王慶雲酌量情形應如何分投援剿之處卽行知照該提督由何路進兵免致兩歧至協濟餉需據稱已解銀十一萬兩此後仍著源源接濟黔省餉項無出該督當已稔知卽蔣玉龍一軍不在桐梓一路亦當設法籌解無使缺乏將此由五百里諭令知之○戊辰諭軍機大臣等福興奏縷陳浙江喫緊情形請飭迅籌重兵堵扼一摺據稱洪逆以金陵危急數次求援於石逆石逆遂率撫建新淦之匪傾巢而出該逆自統大隊號稱十餘萬擬先據廣信直犯蘇

杭以分金陵之勢見在逆匪已越廣豐而北竄至大南橋饒廷選已退紮玉山福興所有之兵止能專顧信郡其旁竄浙江之路在在空虛恐誤大局等語逆賊因金陵圍攻甚緊率其大股旁竄浙疆意圖分我兵力設一旦令其闌入不獨金陵功敗垂成東南大局豈堪設想著和春等卽調撥勁兵二三千名選派得力大員管帶星馳前往常山玉山一帶扼要堵截並與饒廷選會商進剿機宜併力堵禦保全浙境卽所以截斷金陵援賊自顧藩籬該大臣等當以大局爲重毋稍延緩致誤事機將此由六百里加緊諭令知之○諭前因江西賊匪圖犯廣信並分竄鉛山等處諭令王懿德於閩省派兵一二千名或由邵武進剿建昌或由崇安前進與江西兵勇會剿以分賊勢本日據福興奏賊匪自竄踞河口鎮後復沿河東上距廣信府城十餘里據挈獲賊黨供稱石逆因金陵

逆賊疊次求援欲由江西東路直犯蘇杭以掣金陵大兵之手賊眾傾巢而出分作六起號稱十餘萬如攻撲廣信不能得手卽由廣信竄撲江山等處以圖直入浙境見在賊已竄過廣豐饒廷選一軍退至玉山情形危急請飭撥兵援救等語本日已諭知和春於江南軍營酌撥兵二三千名前往常玉山等處會剿惟賊勢極爲猖獗江南正在圍攻金陵所撥兵能否卽到尙未可知福興一軍斷難兼顧玉山等處王懿德接奉前旨後諒已酌派兵勇出境第此時賊既專注浙省則進攻撫建轉非要策自以堵賊犯浙之路爲急糧道趙印川帶兵素稱得力此時尙在邵武一路著王懿德速於閩省各標營內抽撥勁旅數千名或卽交趙印川統帶由崇安前進繞出賊前相機堵剿一切糧餉軍裝均著迅爲籌備賊勢剽悍非重兵不能堵禦該督務當注以全力並不得稍涉遲延

以致貽誤大局又上年曾調廣東兵二千名據葉名琛奏稱九月間已令啟程由福建汀州取道赴撫建救援迄今未見報到著王懿德迎探廣東潮州鎮總兵壽山曾否帶兵行抵撫建等處或在何處逗留並著催提赴援常玉山等處是爲至要將此由六百里加緊諭令知之○兩江總督何桂清奏黃宗漢已於二月初三日由蘇赴浙上海續到火輪船二隻又有英國兵船二隻俄國兵船一隻寄泊吳淞外洋尙無動靜廣東巡撫柏貴等奏見在已與洋人開市通商各酋均已歡悅而去見止數百人在城中惟不肯搬移出城必欲俟大局議定始肯退出奏入諭將摺件鈔給黃宗漢閱看參酌辦理○命前任湖南布政使徐有壬馳赴江蘇辦理江南軍營糧臺事務○庚午諭內閣和春奏官軍疊獲勝仗克復秣陵閣一摺金陵逆賊分踞秣陵關疊經官兵痛剿尙復恃險抗拒

正月二十四等日總兵李若珠等移兵節節進逼賊匪由東南北各關疊次傾巢出撲均經擊退二月初二日之戰殲斃賊匪尤多兇焰始衰官軍遂渡河繞出郭家橋紮營橫截秣陵殷港之衝斷賊糧藥賊愈洶懼二十三日復將黃泥港白塘村王家莊等處賊壘悉數踏平關內賊勢不支遂圖竄逸十四日李若珠等派兵潛赴關北葛塘寺等處分路埋伏以備截剿竄賊遂派副將劉繼三等攻東關遊擊馬得昭等攻北關遊擊劉成元等攻西南兩關兵勇踊躍用命同時進逼馬得昭等奮不顧身斬關直入大隊援附而上內外賊巢同時火發官兵盡力擊剿卽於是日亥刻將秣陵關克復逃竄賊匪亦經伏兵擊殺殲馘無遺不畱餘孽秣陵關爲金陵南面屏蔽逆賊失此險要不難一鼓殲除該大臣等通籌全局布置悉合機宜仍著督飭將士迅圖克復金陵同膺懋賞○

諭軍機大臣等和春奏移兵圍攻金陵需用火藥甚鉅請飭直隸山東山西陝西等省撥解一摺見在秣陵關已經攻克大兵圍攻金陵正在喫緊需用火藥較鉅江蘇軍需局製造不及係屬實在情形著譚廷襄崇恩恆福曾望顏各撥火藥四萬斤仍按照火藥斤數各配擡槍鳥槍子火繩七成分起派員解赴和春軍營以資攻剿此係刻不可緩之需各督撫等務須迅速籌解毋稍延緩貽誤將此由五百里各諭令知之○諭和春另片奏蒙宿官兵及福興咨調援兵均屬無可分撥等語蒙宿一帶毗連北路尙可由山東等省調撥惟廣信爲浙江門戶石逆以大股來犯已越廣豐而北進援之總兵饒廷選退至玉山賊勢甚爲猖獗福興一軍萬難堵禦浙江爲完善之區儻有疏虞蘇杭震動大局可慮石逆此次內犯實爲金陵逆眾求援而來故盡率撫建之賊傾巢出撲迥非

尋常窺伺可比雖據福興奏浙省兵勇共有二千三百餘名而未
經行陣深恐不能得力除江南大營外實無可調勁旅昨所發寄
諭業已詳悉指示和春等不可視爲泛常著卽剋日酌調務須湊
足二三千名方敷剿辦見在圍攻金陵之兵自無可調撥此外除
鄧紹良及東壩高淳等處防兵亦不可掣動著於各處畱守官兵
內酌量調派其統帶將領必須實在得力之員始能以少禦眾著
和春等迅速選派卽令由浙江前赴常山玉山等處助剿至糧臺
總辦已另派前任湖南布政使徐有壬前往接辦軍餉本不應浮
濫惟因功在垂成姑准照舊支領復經疊降諭旨俟金陵克復後
先將不受約束之兵遣撤歸伍其素有紀律者令何桂清於例餉
之外籌及賞需所以體恤兵丁寬其既往者不可謂不至若再桀
驁把持不能迅圖克復是徒以厚餉養驕兵斷不能再事姑息但

傳金陵早克一日卽兵費早省一日當此餉源未裕而事機正有可乘該大臣自當迅速圖功力求撙節也蕪湖爲金陵上游江路賊援未能斷絕尤應嚴爲之防著和春等嚴飭水師實力堵截卽日金陵克復賊由水路內竄亦不可不防並著豫籌布置勿稍疏漏將此由六百里諭令知之○以克復秣陵關賞和春太子太保銜張國樑雙眼花翎許乃釗以三品京堂候補○予陣亡總兵官虎坤元祭葬世職建祠○以捐田贖族賞吏部侍郎張祥河御書匾額○辛未諭軍機大臣等彭紹章等奏會議海運米石分成仍歸河運請飭有漕各督撫籌畫試行一摺海運漕船本屬一時權宜之計見在瓜鎮克復江路已通運河設法挑濬人力可施黃河一帶商船停泊不少自應將糧石酌分成數河海並運以圖經久之規著何桂清庚長李鈞邵燦趙德轍晏端書崇恩按照所奏

各就地方情形通盤籌畫本屆如可試行卽於海運漕糧內分定
成數改歸河運備因趕辦不及須俟來年亦應豫爲籌定惟所稱
以三成試歸河運以七成仍歸海運河運米數未免太少能酌加
成數更爲妥善至引水濟漕雇船節費並嚴禁地方加派河工開
銷等弊是在各該督撫認真稽查並遴派委員實心督辦一切章
程均著會同妥議迅速具奏原摺著鈔給閱看將此由五百里各
諭令知之尋奏江浙新漕仍請全由海運毋庸另議更張從之○
諭本日據何桂清奏募勇增餉籌款艱難等語復經文煜縷陳軍
營積弊一摺前因江南官軍進擣金陵立盼奏功是以特允該督
所請於兵勇口糧量予加增以冀眾心感激若各營任意虛糜原
應酌量裁減何桂清籌餉艱難朕所深悉卽文煜調辦江南糧臺
撙節度支亦無不合惟和春所統兵勇溢領積習相沿已久如該

藩司所稱營員侵吞肥己兵勇冒領重支此等弊端豈能不加查覈見派徐有壬接辦仍須該督籌畫調度何桂清與和春等商辦軍務意見素能浹洽儻因軍餉而致文武不和於大局恐有妨礙所議添募壯勇若因節費置之不問亦恐軍中有所藉口仍著該督酌量添募總期迅速成功卽是節費之道將此由五百里諭令知之○壬申諭軍機大臣等吳振械等奏宣威剿匪獲勝並省回就撫散練滋事等語吳振械駐紮曲靖與桑春榮籌辦省城安撫事宜已漸有定局乃宣威回匪竟敢褻脅漢夷各匪撲攻州城經張亮基督同司道簡選兵練立即擊退此等冥頑回匪自當懾以兵威使已經受撫者不敢相率效尤仍不外分別良莠剿撫兼施至曲靖距宣威甚近急應加意撫綏不令煽惑勾結張亮基帶兵前進吳振械仍宜嚴防後路不可大意見在省城回眾既經具結

不復滋事卽係良民豈容散練任意戕害除已獲各犯業經正法外著桑春榮將餘犯拔名弋獲執法重懲以安眾回之心將此由六百里諭令知之○諭福濟奏壽春鎮總兵鄭魁士性情驕蹇與諸鎮不和頗難駕馭請飭赴江南軍營聽候和春調遣卽飭傅振邦酌帶精兵前赴廬州並將秦定三帶去之吉林營總關保富和兩起馬隊帶回以資分撥等語廬州防備北路固屬緊要惟江南正當圍攻金陵喫緊之際傅振邦幫同鄧紹良保守甯國亦屬得力之員能否前赴廬州與鄭魁士對調著和春酌量情形奏明辦理如傅振邦未能抽身此外另有可調之員並著酌派俟該員到廬後再令鄭魁士前赴江南其關保一員前經和春奏明帶領傷病兵丁回旗此外馬隊是否可以調撥並著體察情形酌辦可也將此由五百里諭令知之○諭福濟奏廬州需餉緊急江蘇分撥

二萬今歲尙無報解山東欠解皖餉一百五十萬兩屢催罔應陝西每月二萬亦數月不聞起解請旨飭催等語見在粵捻各匪竄擾廬州分投援剿餉項必須應手著何桂清曾望顏各按月准撥餉銀二萬兩解赴福濟軍營並著崇恩籌撥餉銀四五萬兩派員解赴廬州以資接濟將此由五百里各諭令知之○癸酉諭內閣蔣爵遠奏麻哈州城失守見飭文武各員堵剿一摺貴州麻哈州高規地方於上年十一月被匪滋擾經該撫派令吉州鎮總兵巴揚阿督兵援剿本年正月十五日賊匪由高規一帶來撲巴揚阿督飭遊擊王萬祥等帶兵迎剿斃匪數十名奪獲刀矛二十餘件連日進剿前後又斃賊數百餘名二十二日突有民練開城逃遁匪卽乘勢擁入以致州城失守著蔣爵遠督飭巴揚阿等迅將州城克復勿致蔓延該州文武各官下落著查明據實具奏○甲戌

論軍機大臣等晏端書奏江右逆匪竄撲廣豐縣城浙省邊防喫緊力籌堵剿情形並片奏逆匪欲犯建平東壩甯郡危急各等語江西臨江敗匪撫建股匪由鉛山竄回廣豐縣城欲擾及浙江以牽掣金陵之師自河口至上饒廣豐蔓延百餘里逆賊不下六七萬勢甚猖獗玉山兵數有五千餘名晏端書已咨令饒廷選統領各隊並飭遊擊楊國正由江山前進沿山會剿力解重圍惟賊眾廣集兵力尙嫌單弱浙江爲完善之區斷不可任其竄入該逆既傾巢而出撫建情形已空不可不兼顧廣信一路以全大局耆齡前奏新淦得手後卽分撥一軍往助貴溪此時廣豐被圍亟應撥兵防剿該省如劉長佑劉于溥普承堯田興恕等皆係得力之員著耆齡酌量調派務須繞出賊前迎頭截擊或因道路紆折亦當跟蹤追剿以掣賊勢前調之江南及福建官兵並著晏端書等分

別催提以資防剿潮州鎮總兵壽山前帶廣東官兵二千名由福建汀州取道赴撫建救援見在是否已抵江西著耆齡查明該鎮在何處逗留迅速催赴常山玉山一帶毋許遲誤逆賊竄踞黃池灣沚後賊黨日增意欲竟犯建平東壩窺伺蘇杭鄧紹良因金陵無兵可分添募壯勇所需軍餉較多著晏端書設法籌撥源源接濟毋誤要需將此由六百里各諭令知之○是月蠲緩福建邵武等三十二府廳州縣安徽宿州等二十五州縣被兵被災新舊額賦展緩福建龍溪等四縣舊賦並給衝坍屋費賑災口糧

三月丁丑朔諭內閣勝保等奏商捐抵完協貼請刪除捐釐名目等語安徽涿河口三河尖等處設局收捐原以協濟軍餉前經庚長等奏明將釐捐抵完協貼銀兩所有鹽務捐釐名目自應刪除並裁減委員人役以節糜費所收鹽課每月以二萬兩充勝保軍

營兵餉仍由各委員就近解交儻有以多報少卽著查明參奏其
每月收數卽由河南軍需總局彙案造報以歸覈實而免軼轍○
諭勝保袁甲三奏官軍移營進逼賊壘大獲勝仗立解固始城圍
一指逆賊圍攻固始疊經官軍進剿獲勝賊勢仍形猖獗勝保激
勵將士剋期大舉統計攻破賊營二十餘座殲斃粵逆擒逆一萬
餘人生擒一千餘人賊目僞額天侯卜占魁等三百餘人悉被擒
斬固始城圍立解出力文武員弁兵勇著勝保等查明保奏候朕
施恩所有敗殘餘匪仍著督飭將士分路搜剿無畱餘孽○諭滿
慶奏扎薩克喇嘛因病告休呈請轉奏一摺扎什倫布之扎薩克
喇嘛朗結曲丕前因班禪額爾德尼之呼畢勒罕尙未出世賞給
色噶本諾們罕名號並頒給印敕使管理地方事務多資裨益今
因病請休著卽照所請仍畱色噶本諾們罕名號以終其身其印

意侯伊故後再行繳銷所遺扎什倫布之扎薩克喇嘛缺著擬正
之四品曲琿堪布羅布藏郎結補授所放扎薩克喇嘛亦著加恩
賞給印敕以昭信守其應賞印敕著該衙門照例辦理○諭滿慶
奏查驗達賴喇嘛之呼畢勒罕出世之幼子掣定奏聞一摺本年
正月十三日駐藏大臣會同喀徵阿齊圖呼圖克圖堪布喇嘛率
同眾喇嘛奉經由金瓶將番民朋錯測旺之子明珠爾丹測加木
錯之名掣出定呼畢勒罕之時因班禪額爾德尼之呼畢勒罕尙
未及歲不能命名是以喀徵阿齊圖呼圖克圖按佛道伊師達賴
喇嘛之呼畢勒罕卽以阿旺羅卜藏丹貝加木燦琛呼加木錯命
名甚屬吉祥朕心不勝欣悅惟該呼畢勒罕年甫三歲見住布達
拉山附近寺內著喀徵阿齊圖呼圖克圖畱心善事俟及歲後應
坐牀之一切事務著滿慶妥爲辦理照例具奏○諭滿慶奏唐古

忒番民苦累據情代奏一摺唐古忒因重修布達拉山上樓房工程並辦理達賴喇嘛呼畢勒罕事宜情形甚屬苦累著加恩卽在備存察木多拉里西藏三臺盈餘生息銀內賞給銀一萬兩毋庸按年歸還以示體恤其餘著照所請由糧庫支給仍按年扣還歸款○御史錢桂森奏前任尙書陳孚恩才識優長請賜擢用得旨陳孚恩曾任一品在京候補擢用朕自有權衡況如何擢用更非臣下所應擅擬此非末僚湮沒無聞者比該御史豈不知之而故爲此奏以試朕待陳孚恩眷顧若何非受人所屬卽有意市恩况朋比黨援我大清從無此臣子此風亦斷不可長所奏實屬荒謬此摺著大學士六部尙書侍郎等同看至應如何將該御史薄示懲處之處著卿等酌議具奏○以固始解圍予副都統勝保以都統用賞還黃馬褂巴圖魯名號河北鎮總兵官樂善以提督用賞

穿黃馬褂餘升擢有差○戊寅官文都興阿胡林翼奏據湖北糧道唐訓方稟稱二月初六七等日太湖之賊在安仁河一帶築壘初八日分股上撲我軍攻其不備殺賊二百餘名安仁河一帶未成之壘悉行埽平初十日賊由安仁河至蘄州之黃泥畝守備梁洪勝督軍偪近賊巢擒獲偽丞相韋潮綱眾賊擁至我軍四面合攻團勇從山巔壓下賊眾大潰追殺六七里平壘七座斃賊千餘名十二日該匪萬餘復由黃花嶺竄望天畝撲皖之英山縣城臣都興阿派參將富森保德明等前往應援十三日各營兵勇攻賊於青天畝平壘八座焚斬殆盡是日唐訓方親赴牛頭沖一帶率各營分路前進十四日直趨南陽河賊於北岸依山築壘我軍將抵南岸賊亦渡河而南都司余際昌乘賊半渡擊之轟溺多名後渡之賊分股包鈔知縣丁銳義等分投截擊破斃賊目三人餘賊

鳧水而逸我軍潛渡下游繞伏北岸山谷間俟全軍北渡偪近賊壘拋擲火器破壘三座羣賊紛至救援山後伏軍齊出賊遂大敗平壘二十九座斃賊一千數百名生擒一百三十七名陣斬僞倚天侯陳士棠等多名此次太湖南陽河賊匪盤踞數月疊經懲創實足寒賊膽而振軍威所有連次獲勝尤爲出力文武各員先行開列仰懇 天恩分別獎勵陣亡教諭王炳榮請交部從優議卹其餘在事兵勇可否擇尤保獎出自 聖裁 上諭內閣此次該員弁等以少擊眾均獲大勝自應先加獎勵湖北糧儲道唐訓方著賞給奇齊葉勒特依巴圖魯名號知縣丁銳義著免補本班以同知儘先補用都司余際昌張嵩齡均著免補都司以遊擊儘先補用余際昌並賞加參將銜把總楊作霖著以守備儘先補用並賞加都司銜賞換花翎守備梁洪勝張養吾朱恢三均著免補守

備以都司儘先補用並賞加遊擊銜賞換花翎其餘出力兵勇著准其擇尤保奏陣亡敕諭王炳榮著交部從優議卹○諭軍機大臣等本日據官文等奏楚省邊防喫緊前派赴商城之舒保一軍已咨調一千五百名以助都興阿剿匪等語見在固城之賊迭經勝保等督兵剿擊已解城圍英桂剿辦阜陽土匪亦一律肅清業經行抵汝甯已諭令就近督兵會剿商城零匪無多當可無虞延蔓英霍之賊見已竄入羅田邊境窺伺蘄水蘄州都興阿兵力單薄楚省軍情較爲喫重著官文等卽飭舒保一軍仍回羅田麻城一帶會同都興阿實力防剿以顧楚省門戶將此由六百里諭令知之○諭英桂奏阜陽敕匪撲滅淨盡並請畱舒保馬隊及九江營勇助援商固等語昨據勝保等奏固始縣城業於前月二十三日解圍該撫尙未知悉本日復據官文等奏英霍賊窺伺蘄州勢

甚猖獗已調舒保所帶兵勇一千五百名前往助剿見在豫省情形較緩而舒保一軍既經分撥爲數無多且蘄州兵力尙單已諭官文等飭令舒保統帶全軍折回蘄黃一路協同都興阿剿匪著英桂毋庸截畱至固始解圍後勝保所帶各兵尙可分撥邱聯恩一軍與其畱防後路不如進剿商城令與該撫所帶各兵會合不難剿捕肅清也將此由六百里諭令知之○兩江總督何桂清奏上海各洋船於二月二十二至二十四日陸續駛赴天津共有兵船火輪船十隻尙有英國兵船數隻隨後赴津烏勒洪額等奏三十日有俄國火輪船二隻來至闌江沙七度水以外投遞公文稱有善事面商已派委員前往探詢奏入諭崇綸赴天津會同藩司錢忻和前往妥爲曉諭察其動靜再行籌辦並諭總督譚廷襄暫駐天津酌辦防堵事宜都統西凌阿駐山海關相機防範○命刑

部左侍郎國瑞正黃旗護軍統領珠勒亨正紅旗漢軍副都統富

勒敦泰赴山東一帶彈壓土匪巡防河岸○以文祥署刑部右侍

郎

由詹事府詹事署

○己卯諭軍機大臣等據法福禮裕瑞奏浩罕遣使

懇求通商鈔錄諭帖呈覽一摺首逆倭里罕在喀什噶爾滋事罪

大惡極見在逃赴浩罕法福禮等諭令拏解來營始准通商自係

正辦惟據該浩罕伯克派額爾沁等聲稱倭里罕鬧事後曾派人

擋路禁人附從又將倭里罕拏禁如准其通商卽將逆首罪名照

經典自行懲辦等語情詞尙屬恭順該夷經典旣無捆獻霍卓之

說此時若不准通商勒令獻出恐致別生枝節如果浩罕已將倭

里罕等按照經典懲辦卽可准其通商其如何懲辦之處亦可無

庸深究著密訪奏聞見在邊疆甫定未可再開釁端該大臣等惟

當撫綏回眾嚴防卡倫毋令匪徒乘間滋事將此諭令知之○辛

已 皇后祀

先蠶

○諭軍機大臣等胡林翼奏浙江軍情緊要

請調江西帶勇道員李元度赴浙防剿一摺江西大股賊匪欲竄浙江已由廣豐將至玉山該處爲浙江門戶防剿實屬緊要惟前據福興奏李元度在貴溪一帶抵擊竄匪屢次以少擊眾頗爲得力若竟調往玉山則廣信一帶空虛亦恐顧此失彼李定太爲江南軍營出色人員見在進賢賊匪業已傾巢而出可調李定太帶兵迅速往援廣豐即可與饒廷選分投夾擊以保浙江門戶著福興耆齡酌量情形卽飭李定太偵探賊蹤所向移緩就急以固浙防至前諭耆齡就近撥兵赴援諒必遵旨辦理福興退守廣信如賊勢進趨廣豐亦當相機前進會合追剿不得藉口兵單一籌莫展致令賊勢蔓延自干咎戾將此由六百里各諭令知之○以江南江浦剿賊出力復道員溫紹原職○壬午諭軍機大臣等據英

桂奏各匪回竄六安商固境內已無賊蹤惟因潁屬逆捻竄擾太和偏近歸陳邊境該撫改赴沈項相機堵截自應察看賊情何路喫重卽由何路進兵至隨營兵力單弱勝保所帶兵勇如可分撥卽與商酌辦理該副都統雖已回剿六安商固後路尙須策應邱聯恩調紮汝甯如商固空虛卽著飭赴光屬爲勝保後路若太和竄匪猖獗必須該總兵前赴沈項助剿卽著該撫通籌緩急酌量調遣毋得專顧一隅致有疏失將此由六百里各諭令知之○癸未諭內閣德興阿等奏環攻江浦克復縣城一摺江浦縣城被賊占踞聚黨屯糧意在固守德興阿等親督總兵安勇等四面環攻該逆由城南撲出二千餘名勢甚猖獗經參將魁麟都司王希堂等分路包鈔會合痛剿鞠殿華督兵攻西門及求雨山一帶槍斃首逆洪秀泉之姪洪芒涓一名餘賊遁回城內其城外賊匪悉就

俘執復令兵勇攻南門適九洑洲出賊千餘經羅玉斌等分路迎
勦直衝賊陣砍斃黃衣悍賊二名殲賊數百名溺死無算鞠殿華
當將求雨山賊先行攻破海全等復縱火延燒南門外賊營富明
阿等帶領兵勇由西門登梯上城拋擲火箭火礮賊眾拌死衝出
各路兵勇四面搜殺當將縣城克復共計斃賊二千餘名焚燒淹
斃不計其數陣斬偽幟宗首級生擒偽將軍總制等多名悉予駢
誅所有克復城池在事文武員弁均屬奮力圖功著德興阿等查
明保奏候朕施恩○諭軍機大臣等勝保奏軍營用款日繁請飭
各省按月協撥餉銀等語勝保軍營餉需前經諭令英桂督飭藩
司瑛榮接濟見在固始解圍卽須進攻六安勝保袁甲三兩營糧
臺已歸併一處李孟羣隨同進剿兼須接濟斷非河南一省所能
支應亟應寬爲籌撥著王慶雲崇恩恆福各籌撥銀三四萬兩派

員迅解勝保等軍營俾資接濟毋誤要需將此由五百里各諭令知之○諭勝保袁甲三奏追賊獲勝見籌進攻六安並請飭英桂進駐潁毫各摺片固始殘敗賊匪見旣麇聚六安自應全力專注迅圖克復然後徐籌各路英桂昨奏逆捻偪近歸陳仍赴沈項一帶扼要堵截已諭令察看緩急酌量進剿自未能兼顧潁毫朱連泰所帶各勇僅止數百自應酌量添撥前調之山西兵一千名本日據恆福奏報已於二月二十日及二十八日先後啟程此項官兵到豫卽著飭赴亳州合力攻剿袁甲三見在正陽於潁毫一帶自可隨時調度英桂俟豫境情形稍鬆再行相機進止李孟羣一軍未免飢疲見旣統歸勝保等合攻六安著隨時援應以期聯絡至勝保另片奏陳患病情形該副都統素性勇敢此次力解城圍斬馘無算業經降旨酬庸該副都統年力正壯所患自當卽痊見

在籌兵籌餉之難朕所深悉本日所請撥餉除直隸無可籌撥外已諭令山東山西四川各督撫每省撥銀三四萬兩迅速解往該營以資接濟勝保當悉心籌畫速克六安不可存畏難之見致懈士心將此由六百里諭令知之○予江南傷亡遊擊袁得名祭葬世職○甲申諭內閣前因御史錢桂森奏請將候補尚書陳孚恩卽予擢用語多荒謬當交大學士六部尚書侍郎等將如何示懲之處酌議具奏本日據裕誠等奏稱該御史輒敢將在京候補大員請賜擢用已屬不合並擅擬令入直樞廷專辦夷務所奏實屬荒謬不勝御史之任請旨懲處等語錢桂森著回原衙門行走以示薄懲至御史本有言責卽或所言未當朕必曲爲含容未嘗加以重譴今錢桂森豈不知陳孚恩曾任大員非末僚湮沒無聞者可比如何錄用朕自有權衡乃敢妄言保奏以爲嘗試若非受人

屬託卽屬有意市恩黨援朋比之風斷不可長不得不予以薄懲
嗣後身任言官者仍當畱心時務遇事敷陳以備採擇固不可徇
私干譽自陷愆尤亦不可因此次錢桂森改官共安緘默將此通
諭科道等知之以副朕明目達聰至意○諭晏端書奏官兵攻復
黃池灣沚一摺金陵江北賊匪數萬竄踞黃池灣沚於蒲塘方山
各路增築卡壘欲從紅楊樹內犯甯國郡城署提督鄧紹良會同
總兵傅振邦蕭知音攻剿蒲塘逆卡直搗巢穴攻燬賊營六座該
逆在馬家園一帶搭造浮橋並以大股全撲紅楊樹我軍一面防
其內竄一面議從間道先取灣沚並以奇兵從竹塘方山等處分
路夾攻逆眾大敗我軍連破賊營十五座餘匪逃至清水潭正在
追剿遙見灣沚火光燭天時傅振邦派兵已馳抵灣沚已革遊擊
楊金榜首先越濠踏毀賊巢三座鄧紹良飭令灣沚諸軍分兵進

剿沿途踏毀賊營二十餘座當將灣沚黃池兩隘先後收復境內
一律肅清此次剿辦逆匪尙爲得手著鄧紹良等督飭將士實力
防剿並將南陵餘匪迅速殲除毋稍延緩在事出力員弁兵勇著
晏端書會同鄧紹良擇尤保奏○以攻克皖南黃池灣沚兩隘開
復署提督鄧紹良等處分○改丁憂福建漳州鎮總兵官周天受
爲署任仍辦皖南軍務事竣後回籍終制○乙酉諭軍機大臣等
福興奏沙溪剿賊獲勝並籌辦情形一摺該將軍駐兵廣信饒廷
選扼守玉山自可力遏兇鋒惟據奏稱必須將沙溪一股剿除方
可併力進援廣豐廣豐城小兵單被圍日久深恐力不能支設有
疏虞則賊可繞越廣信由江山一路入浙饒廷選專保玉山儻衢
州有警該逆順流而下無險可扼全浙皆爲震動自當以救援廣
豐勿使竄入衢境爲要務昨令福興調李定太一軍赴援廣豐恐

已緩不濟急著該將軍飭令迅速前往據奏晏端書撥兵八百名並調徽防兵勇千餘人至衢州協剿自應分守江山衢州以遏賊鋒豈可全行調往玉山以致顧此失彼饒廷選係衢州本鎮前此赴援廣豐未能前進此次福興派勇助剿僅令駐紮大南橋遙作聲援又復敗衄似此毫無把握深恐貽誤非輕著晏端書通籌大局妥爲調度速飭該總兵督兵進剿並布置江山一路毋使該逆有隙可乘前此諭調江南大營官兵尙未據和春等覆奏所調福建兵勇見值崇安浦城均有賊蹤未知能否派出全賴江西浙江就近調撥著福興飛咨耆齡將續派江西官兵催令趕緊赴援福興亦當視何處喫重親往何處不得拘守廣信坐視賊匪蔓延他處自取罪戾晏端書統轄浙省當此軍務喫緊之時尤須調度合宜方能有備無患儻用人不當防堵稍有疏虞恐不能當此重咎

也將此由六百里各諭令知之○丁亥諭軍機大臣等據何桂清奏稱金陵大營已調兵勇二千一百名援應浙東近接張國樑來函知將東壩高淳兵勇二千四百餘名調回究嫌地大兵單擬再添壯勇三千名該督已允其設法籌措等語江南官兵攻破秣陵關後卽進攻雨花臺等處剿辦正當喫緊况高淳東壩爲內竄之路亦未可空虛惟念募勇多烏合之眾未經戰陣恐難得力見在江北官軍業經克復江浦如有可撥兵勇著德興阿酌量調撥不拘二三千名交和春張國樑妥爲布置既可節省募勇之費而防剿更爲得力能否調撥之處仍著該大臣妥籌酌辦將此由六百里各諭令知之○廣東在籍侍郎羅惇衍等奏洋人占踞廣東省城臣等招募東莞香山新安三縣壯勇及附近城北之三元里石井大郎等鄉佛山之九十六鄉練勇擬密用閒諜聲言直擣香港

設伏誘使出城惟倉卒舉兵軍火礮械無款可籌向紳商先行借貸一時尙未集事奏入 上諭該侍郎等惟密籌防備候旨遵行俟黃宗漢抵粵一切機宜即可與之商辦所有捐輸未保紳民咨明黃宗漢迅速出奏以慰人心該侍郎等在局辦事准其用木刻關防此後情形黃宗漢未到以前仍遞交湖南由駱秉章馳奏其見在捐輸人員卽由羅惇衍等查照廣東事例隨時奏請獎勵各團得力之人並准由總局酌給六品以下功牌俾知激勵湖南郴州知州馮汝芬准其畱粵委辦一切事宜候補主事陳桂籍等六員均著交羅惇衍等差遣委用○戊子諭軍機大臣等前因固始被圍甚急諭令官文飭催舒保帶兵前進茲據該大臣奏稱英霍逆匪窺伺蘄州蘄水於舒保一軍抽調一千五百名馳往援應並瀝陳舒保係二品大員勝保嚴札驅迫加以苛詞於體制未協等

語朕披覽所奏並未降旨切責勝保乃本日該副都統奏稱官文
於此事有心挑剔等語反復辯論其意甚屬不平勝保勇往任事
朕屢次嘉許又見其不免有躁氣矜心曾加訓誨今官文卽措詞
失當勝保旣知師克在和不值於筆墨之間斤斤計較况此時掌
兵大員但當共濟時艱豈可各存意見於公事轉有窒礙見在督
兵進抵河口集連日攻擊六安賊巢獲勝著卽趕緊克復州城爲
節節進剿之計本日復據李孟羣奏由豫回皖道途平坦請撥馬
隊等語吉林黑龍江馬隊無可再撥勝保前因李兆受竄至葉家
集知照李孟羣會合明慶攻剿並稱酌畱馬隊一二百名此時勝
保回剿六安更可將馬隊與李孟羣通融分帶至舒保甫經撤回
斷無令其僕僕道途之理况湖北見亦喫重所奏著毋庸議將此
由六百里諭知勝保並傳諭李孟羣知之○己丑諭內閣湖北提

督德安著前往廬州會同福濟辦理軍務鄭魁士著調赴江南軍營協同剿匪鄭魁士所帶廬州兵勇卽交德安統帶其壽春鎮總兵一缺著福濟派員署理○和春奏官軍自克復秣陵關後二月二十一二等日李若珠等冒雨督師將三山營江口賊壘二座先行奪毀殺賊甚多隨卽從板橋杏花山常固山一路移營進占與三汊河逆壘對峙該逆潛於善橋之西築壘設卡拒我東趨二十六日李若珠等分兵三路會擣賊營並飭遊擊向奎等佯攻西善橋賊壘以牽制之我軍齊抵三汊河參將劉萬德馬德昭搶渡過河殲執旗逆目數名餘皆披靡李若珠親督馬隊斃賊多名將該逆新築營卡踏平乘勢直撲三汊河老巢李若珠密令馮觀勝等帶領軍士或十數人或數十人於三汊河旁作爲探路樵汲之狀該逆見我人少卽分投出逐我軍誘其離巢漸遠伏兵齊發該逆

回奔馮觀勝戴佐英搶過浮橋三道大隊填濠競進賊營七八百人悉數殲除三汊河東十里爲西善橋又東爲小行該逆踞守與三汊河互相犄角周天培戴文英密飭馮觀勝戴佐英帶兵百人卽用所得賊營衣幟馳赴西善橋一面派遊擊馬騰霄等在善橋分路設伏馮觀勝等徑奔賊營該逆營門甫開我軍刀矛火器一齊衝入賊匪不知官兵多寡奪路狂奔馬騰霄等四面兜圍殺賊約以千計立將西善橋老巢攻克周天培等將沿途賊卡十餘座一律焚燒轟斃淹斃之賊不可數計周天培當派姚爵階等直擣小行殲賊無遺遂將小行逆巢奪據李若珠亦部署士卒從三汊河西北進攻大勝關派副將劉季三等分隊環攻該逆始猶抵拒嗣見寡不敵眾棄營而逃計殲賊五六百名此二月二十一日以後疊毀賊巢大獲全勝之情形也

臣

與張國樑許乃釗相商金陵

形勢以太平神策等門爲左翼以雨花臺爲右翼三山板橋爲咽喉三汊河西善橋等處爲脈絡今左右兩翼均已剪除自大勝關迄小行數十里內壘卡皆平其勢漸成孤注應卽由安德門石子岡以上鈔出雨花臺之前接築長圍全局俱歸掌握當由張國樑親往西南相度形勢二十九日派李若珠一軍由落星寺至西善橋聯紮十三營以固後路三十日派周天培戴文英兩軍由西善橋至安德門扼要紮營該逆由雨花臺傾巢出撲南門水西門又各出悍匪三四千意圖鈔襲我軍分路追剿戴文英指揮將弁直搗中堅斃黃衣逆酋數名馮觀勝等左右馳突殲殪甚眾南門一帶逆隊經李若珠等帶兵痛剿殲賊七八百人張國樑已督兵紮營包過雨花臺卽可漸抵上坊橋賴鎮海督飭艇師亦於是日聯檣上駛行經九汊洲草駁峽等處賊匪聯築礮壘我師乘風揚帆

施放大礮轟塌該逆望樓一座並毀其礮隄斃賊無數水師見已排泊落星寺江濱與綠營聯爲一氣三月初一日張國樑督同李若珠等正在催趙夫勇由石子岡左右築營突見賊眾自雨花臺聚寶門蠶擁而來當飭劉季三等各帶勁兵設伏俟逆眾漸近將賊隊橫衝爲二雨花臺山岡又出逆匪數股竭力相持周天培馬德昭躍馬直前短兵相接斃賊不計其數我軍新營均已蒞工此連日水陸各營直逼雨花臺接仗獲勝之情形也查逆渠占踞金陵稽誅六載今幸仰仗天威將士用命由三山直達雙橋鳳台以至上坊等門悉爲我守實屬數年來未有之氣象此後能斷城賊接濟其勢自難久踞東北一路五十餘里營壘之外濠牆迤邐聯屬該逆斷難飛越西南一路我師又已聯紮四十餘營銜接八十餘里刻下德興阿大兵克復江浦進攻九洲賊巢臣等已飭

賴鎮海嚴督水師晝夜巡防以杜賊船北竄一面督率鎮將迅圖收復金陵上諭內閣官兵進擣金陵連奪逆巢營卡直徧雨花臺疊獲大勝所辦甚屬得手仍著和春張國樑等督飭諸軍迅圖攻克金陵擣穴擒渠以副朕望○署直隸總督譚廷襄等奏俄國投遞公文並將英米佛三國公文進呈經軍機大臣拆閱皆係求轉遞大學士裕誠照會文內均請欽派大臣前往會議俄米之意皆欲從中調處和釋軍機大臣奏入諭譚廷襄等斟酌理設法開導一切情形隨時馳奏○江南河道總督庚長奏運道無滯得旨汝與諸臣宜妥議定章視汝急於復舊恐爲屬吏所蒙茲值支絀之時斷不能如當日河員沾潤也○實授譚廷襄直隸總督○庚寅諭內閣英桂奏截畱漕糧分別運解折色並懇暫緩籌補運京一摺河南省應解勝保及福濟軍營截畱漕糧暨截撥安徽

及該省災區放賑漕米均著准其援照成案變價折解以免稽遲
其截畱勝保等軍營漕糧七萬石並著准其暫緩籌補○諭福濟
鄭魁士奏進攻和州連獲勝仗旋即克復州城一摺賊匪占踞安
徽和州並於河村鋪等處分紮營壘抗拒官兵本月初一日參將
錫昌等分路進擣殲斃執旗賊酋一名又追殺百餘名斬首多級
次日官軍進圍河村鋪副將惠成等揮兵急攻逆眾敗退入巢副
將鮑雲翥由烏衣帶勇趕到會攻和州該州陳麒昌徧集鄉團協
助聲勢初三日鮑雲翥等奮勇過濠督兵分圍賊營縱火大舉逆
眾潰竄時城內之賊傾巢出救我軍乘勝迎剿即由河村南面直
追進城分門襲入共斃賊二千餘名當將州城克復此次官軍以
少勝多攻奪要隘剿辦尙屬得手仍著福濟等督飭將弁迅將和
州東北烏江芝蔴河等處賊營一律掃除再行進攻巢縣以清腹

地所有出力員弁兵勇著該撫擇尤請獎候朕施恩○諭蔣霽遠奏都勻府城失守一摺賊由麻哈州城竄撲都勻府城該府城自前年收復後居民復業者尙少此次賊勢猖獗遂於正月二十九日復爲賊陷著蔣霽遠卽飛咨蔣玉龍督帶兵勇進剿迅將該城克復所有文武各員下落並著查明具奏○諭軍機大臣等英桂奏願屬逆捻竄踞鹿邑地方馳赴陳州堵剿一摺逆捻尹老賊等眾至萬餘由太和境內竄踞鹿邑張胖店等處築圩拒守亟應趕緊撲滅以免蔓延英桂見帶兵勇不足四千新調陝甘官兵又分赴勝保軍營一千名尙恐兵力單弱未能迅殄賊氛勝保於固始解圍後已進剿六安李孟羣亦由豫赴皖六安兵力較厚見在歸陳一帶情形緊要著勝保酌度緩急派撥兵勇交英桂調遣務將此股捻匪盡數埽除以保完善之區至英桂奏請調吉林黑龍江

馬隊餘丁各二百名並調佐領綽倫保等各員該省餘丁見在無
可抽撥擬難再調既無馬隊卽無需管帶之員著無庸議惟該撫
因馬賊甚多需用馬隊仍著與勝保酌量通融伊興額等已攻破
百善站賊圩所帶馬隊如何分撥亦可酌調以資攻剿將此由六
百里各諭令知之○諭福濟等奏攻克和州請飭德興阿派兵堵
扼一摺和州爲北岸上游要地既經攻克自當扼要設防該撫因
兵力不敷分布請飭該大臣選派鎮將統帶勁旅五六千名會同
守禦原爲斷絕賊援之計惟江浦雖經克復而九洲洲一帶賊匪
尙多昨因和春大營分兵赴援浙東恐東壩等處空虛已諭德興
阿酌撥兵勇二三千名交和春等布置能否調撥若干名尙未據
德興阿等覆奏未必有五六千名之眾能抽赴和州德興阿見在
靖蕩九洲洲一帶餘匪卽著節節進剿並飭舟師上駛當可與惠

成等所帶之兵聯絡聲勢毋庸另議調撥昨已明降諭旨派湖北提督德安會同福濟辦理軍務鄭魁士已調往和春軍營協同剿匪壽州鎮總兵令福濟派員署理廬州兵勇卽交德安統帶矣德安行抵廬州卽著鄭魁士交卸前往金陵福濟當與德安同心協力共籌剿賊之策前此福濟撤回墨爾根及呼倫貝爾兵四十二名咨奕山等如數挑補所費整裝銀至二千餘兩以四十餘名之兵於事未必有益而道里遙遠所費不少殊爲非計嗣後遇有老弱傷病之兵爲數過少撤回後母須補足將此由六百里各諭令知之○予貴州麻哈州守城殉難已革提督佟攀梅開復原官並知州何鋌祭葬世職○辛卯諭軍機大臣等晏端書奏賊匪竄陷江山縣城見籌堵剿情形各摺片江西大股賊匪分竄玉山廣豐又復全股直趨江山以致縣城失陷該撫飛調江長貴等軍復催

提明安泰李元度等各軍一併赴衢會剿並飭署臬司段光清駐紮嚴州策應一切事宜布置尙屬周妥見在調赴江山一路之兵不爲不多而玉山一帶亦關緊要據奏畱防兵勇僅有二千餘名尙覺單薄深恐我軍全力專注江山而賊匪復乘虛竄入玉山不可不通籌兼顧以固藩籬其派往江山之兵計已將次到齊旣統歸周天受調度卽著督飭在事文武奮力攻剿速克縣城如果事機緊急必須該撫親往所有省城防守事宜卽交瑞昌督同文武官紳妥籌布置瑞昌晏端書另奏請調乍浦滿洲兵四百名來省協防一摺著准其如數調往以資防守將此由六百里諭令知之○諭前因賊竄廣豐浙防喫緊諭令福興催調李定太一軍前往並察度賊勢緩急親往堵剿復諭耆齡將續調江西官兵催令迅速赴援旋據耆齡奏稱已派奇兵等營及同知李元度之平江勇

馳赴上游祥字等營練勇前赴信郡並派參將劉芳等帶兵接防
貴溪弋陽以便李元度等悉銳上援本日據晏端書奏浙兵於廣
豐江山之間接戰不利江山縣城於本月初一日被賊攻陷見已
飛咨福興催令李元度由玉山前赴衢州堵剿等語福興駐紮江
西東路當賊匪由福建上竄株守信郡以致賊眾竄擾河口鎮蔓
及廣豐分犯閩浙厥咎甚重浙省自江山以下無險可扼全省震
動且浦城業已失陷處州等屬均須嚴防本省兵勇實屬不敷分
撥此時李元度當已親赴上游亟應繞出賊前方可得力著福興
耆齡飭令該同知統率平江勇及奇兵彰武等軍速由玉山前赴
衢州會同浙江兵勇迎頭截擊務將該城克復毋令再有滋蔓江
西如尚有可撥之兵卽著耆齡迅速添調爲李元度後路援應至
賊匪既陷江山豈可再任後路之賊源源繼進著福興一面催調

李定太各軍一面親督見有兵勇察度賊勢緊急之處實力截擊
既以保衛信郡亦不至令全股賊眾悉行東竄儻再敢擁兵自衛
觀望不前則此股賊匪之延蔓咎有攸歸斷不能倖邀寬貸也將
此由六百里各諭令知之○以賊竄江山浙江巡撫晏端書下部
議處○壬辰諭軍機大臣等昨因江山失守諭令福興等速調兵
勇分投堵剿本日據福興奏沙溪賊匪被擊敗退廣信情形較鬆
見因衢州危急由玉山退保衢州昨諭福興等飭令同知李元度
統帶平江等兵勇剋日赴衢茲據奏稱已飭李元度駐守玉山並
飭九江道沈葆楨布置廣信各軍相機堵剿福興既親赴衢州著
卽督飭援兵會同饒廷選等以剿爲防務將江山縣城迅速克復
以免賊蹤滋蔓昨據晏端書奏見由各路調赴衢州之兵已屬不
少茲有福興馳往救援當可保浙省門戶惟此股賊匪分路竄撲

各軍全赴衢州恐廣信玉山等處空虛亦屬可慮著福興妥爲調度勿致顧此失彼另片奏潮州鎮總兵壽山逗留不進請飭查辦等語昨據柏貴奏稱先因潮州人心浮動令該總兵暫緩起程嗣因署總兵懷塔布赴京陛見飭令壽山回任所調之兵未據奏派大員統帶出省是此項援兵已成虛望至壽山未回本任以前因何日久逗留俟黃宗漢到粵卽當飭令查參辦理將此由六百里諭令知之○予江西陣亡遊擊賴高翔等祭葬世職○癸巳諭軍機大臣等前因江西賊匪圖竄浙省諭令王懿德派兵由崇安前進相機堵剿本日據王懿德等奏江西逆匪由鉛山等處竄擾閩境分撲崇安浦城軍情萬分緊急等語昨據晏端書奏浙之江山與閩之浦城已先後失守該督等發報時自係尙未知悉該省延建邵等屬土匪未能淨盡儻令逆匪勾結剿辦更形棘手該督等

所派兵勇均係零星湊撥此股賊勢兇悍深恐不敷抵禦所有帶兵將必須選派得力之員方能制勝江山及常玉山一帶已有江西安徽江南等處調兵援應福興亦赴衢州浙江門戶或尙可堅守前諭王懿德調兵赴援江西此時閩境兵力不敷恐難兼顧鄰省著侯浦城崇安賊氛稍靖卽將此兩路兵勇分投出擊以剿爲防毋庸另行調撥新任兩廣總督黃宗漢本由閩省取道赴粵見值江山浦城失陷未知由何路繞至閩省粵東夷人尙未退出省城各營軍械多被搶劫前諭黃宗漢於過閩時酌調漳泉壯勇以壯聲威並調取軍械帶往廣東備用卽著王懿德等俟黃宗漢到時卽與酌量辦理將此由六百里諭令知之○兩江總督何桂清等奏浙東軍情喫緊恐掣動江南全局見籌接濟得旨卿等若是焦急視國如家稍紓朕憂○甲午諭軍機大臣等譚廷襄等奏

接見俄夷情形並譯呈投遞公文一摺朕詳加披覽除所請進京等語已由譚廷襄等據理駁斥外其分界一節自咸豐四年起吉林等處各派委員前往守候而該國屢次遷延約期不至迨該國派出木哩斐岳幅在黑龍江往來行駛又不肯秉公查勘是以日久尙無定議並非中國不爲勘定見在普提雅廷旣不回黑龍江而木哩斐岳幅又有啟程前來之信昨已諭知奕山一俟到來卽與會勘可見中國於此事亦甚願早爲了結如果該國一秉公道自能妥爲查勘今普提雅廷旣不經營此事其所遞文內分定地界之處亦止能諭知奕山與木哩斐岳幅查看此時不能懸擬至海口通商一節可告以爾國通商本止恰克圖一處大皇帝格外施恩又加伊犁塔爾巴哈台兩處較之從前已屬優厚此次旣爲英佛說合而來諒有把握見在該二國尙無成說不便先爲請加

海口通商俟將該二國來意講明並無非理干求悔過回帆了結廣東之事是爾此來實與中國有益彼時奏請海口通商大皇帝必能歡喜允准至喇嘛巴拉第及學生哈喇坡斐擦啟在理藩院具呈欲至海口相見已由該衙門派員護送前往至兩國事有兩國大臣面議該喇嘛等同京母令與聞其事方與體制相合至文內述及塔爾巴哈台一節告以伊犁將軍本已爲之查辦該國商人舍之而去是以案尙未結其畱存貨物中國見尙爲之看管此事起釁根由因爾國殺害挖金之人積怨激成並非中國有不是之處其黑龍江民人居住並非始自今日豈能移於江右至閩省屯等處皆中國地面近年俄國人來蓋屋居住中國因與爾國多年和好未肯驅逐屢次行文爾國未見秉公查辦此時在津但議在津之事其餘原可次第辦理但不得不與爾言明也至米夷來

見嘉其不助英佛之忱看其所求何事妥爲開導其英佛二夷可令俄人告以如係誠心悔過許其帶來相見將此由五百里諭譚廷襄崇綸烏爾棍泰並傳諭錢忻和知之○再展京師內城六門外煮賑一月○乙未諭軍機大臣等李孟羣奏商固續有竄匪見攻金家寨一摺固始解圍後仍有續至匪黨欲圖竄擾雖經李孟羣分撥官兵連獲勝仗而金家寨尙被盤踞自應先將此股擊散該藩司因兵糧無措暫駐固始籌辦兼因賊匪初退防守未固藉資彈壓俟英桂派兵前往接替李孟羣著卽折回六安協同勝保督飭袁懷忠等進兵早拔孤城所有出力保衛地方之團練人等准其俟豫境肅清專案請獎以示激勵○予河南陣亡都司向家聲等於固始縣總建忠義祠布政使李孟羣所部死事弁勇一併附祀○丙申諭內閣晏端書奏請酌畱漕米等語浙江見在辦理

防勦事宜兵勇需餉較多著准其在本年海運漕糧截留八萬石俟來年如數籌補搭運此次姑允其請斷不准續請截留以重倉儲○諭軍機大臣等譚廷襄等奏體察夷情不定請旨將所求之事先行斟酌一摺譚廷襄等因英夷十八日未曾來見派員向俄夷探問據云英夷等所求止有二事等語譚廷襄等惟有仍告俄夷云見在廣東省城尚未交還葉總督尚未送回此時俄國既肯從中說合亦須在中國面上下得去方能兩全若偏聽英佛一面之詞而於中國不便亦礙難辦理卽如通商一節道光年間立定萬年和約原止五口今欲於五口之外另添交易地方卽是不遵舊約中國自議和以來十餘年從未有背約之事今欲將通商之地另議增加從前萬年和約皆是虛設何能取信於中國俄國既爲好而來止可就五口貿易之中有近來辦理不善之處酌量更

改如英夷照會所云各貨運至內地除納稅外有勒索規賄者若有其事中國必當查禁其因年來價值頓減欲議減稅之處亦在情理之中但有減必有增方爲公道未可有減無增止圖自利此中辦法必須通商海口方能知悉此間不能懸擬惟五口總匯向在廣東一切稅則皆由廣東原定此時該省城池尙被占踞中國亦不便先允其請惟有煩俄國大臣將此意告知英夷勸其回粵一面交還城池送還葉總督至天主教亦係從前議定載在和約或越界或遠入內地聽憑中國官查拏解送近口領事官收管我中國惟恪守舊章數年來遇有傳教夷人俱經解回交該國領事官收領從無陵虐情事今因廣東匪徒馬子農在廣西西林縣犯案懲辦佛夷疑爲該國傳教之馬神巫致生嫌隙如果不信亦惟有請旨再飭新任總督秉公查明豈能因彼一面之詞遂謂中國

殘忍卽如該二國擄去葉總督此時伊國公使登岸我國何難報仇因中國以信義待人不作此等無理之事以上各節譚廷襄等可令轉告英佛看其如何回覆再行酌辦所請海口通商許以廣東大局定後必能待爲奏請邀恩惟在海口通商一切事宜與各國相同亦須同到廣東辦理必先有旨諭知新任欽差總督也譚廷襄等辦理事事必須平心靜氣與之理論將此由五百里諭譚廷襄崇綸烏爾棍泰並傳諭直隸布政使錢忻和知之○諭福興奏馳抵衢郡擊退撲城賊匪並晏端書奏衢州獲勝情形各一摺江山之賊糾合玉山廣豐各股匪趨撲衢州數至鉅萬經饒廷選等先期布置激勵民團福興復親至督剿稍挫兇鋒衢郡爲浙東門戶得此勝仗當有轉機惟匪勢尙屬猖獗據該撫奏該逆於初七日夜間復偷築營壘二三十座必得盡數攻燬方可進復江山

縣城福興所部援軍已有六千餘名加以三衢防勇省城續調官兵及周天受明安泰等軍爲數約二萬有餘足資埽蕩所有金陵江西兩路官軍著歸福興調度徽州浙江兩路官軍著歸周天受調度該將軍等迅卽併力會剿先清附近賊壘卽日乘勝攻克江邑再圖進剿其常山玉山等處著仍遵前旨分兵防堵不可專顧一路至界連浦城之處州所屬龍泉等縣前經晏端書檄畱赴衢防守之處標兵一百名並抽調金溫兩營兵著該撫嚴飭該地方官力防內竄江山之賊亦恐由間道窺伺金華余萬清所募鄉勇當能得力卽飭會合民團扼守要隘將此由六百里各諭令知之

○以載崇文祥龐鍾璐俱爲內閣學士

載崇由副都統文祥由詹事龐鍾璐由光祿寺卿遷

○庚子諭內閣樂斌奏循化廳屬撤回滋事派兵查辦完竣一摺甘肅循化廳屬街子工撒拉回民韓朶四因族人韓沖等在城涉

訟滋事被拏輒敢起意糾搶煽惑多人焚毀橋道實屬目無法紀見經官兵剿辦已將罪應擬斬之韓尔四並爲從之韓木洒及在城拒捕之韓冲等一併格斃餘俱悔過投誠地方一律肅清辦理尙爲妥協西甯道崇保捐廉歸補經費著該部查明該員子弟給與獎敘○諭軍機大臣等譚廷襄等奏夷務未有定議一摺英佛兩酋既不肯來亦不必再與訂約仍由俄米兩國轉爲傳說告以此兩國背約無禮不值與之相見所以訂期接晤者原看俄米兩國面上今既兩次爽期來與不來聽其自便昨已奏奉諭旨必須該兩國將廣東省城交還方能逐款定議大皇帝諭令限期於四月底繳還廣東省城如將廣東事速行了結不獨佛夷本可稍從寬恕卽英夷廣東貿易本大臣亦必爲之代奏懇恩至減稅一事與中國有損無益大皇帝因米國恭順旣未允其加增海口故於

五口稅課之中使其受益將來各國均霑卽英佛二國悔過通商之後亦事同一律不待重言至於應減之稅爲數若干此處不能懸擬須由廣東酌定惟說明之後必不食言有俄米二國爲證至英佛二國能否如期將廣東事了結亦須俄米二國中間作保則此事大略已定各國卽可回帆俟該三國定議之日卽可奏請俄國通商之事以便同往廣東與欽差黃總督議定章程也如果英佛兩酋親來卽與之面議否則仍令俄米兩酋來見令其轉述至米夷國書已有旨准其呈遞諒譚廷襄等必已接到遵辦矣將此五百里諭知譚廷襄崇綸烏爾棍泰並傳諭錢忻和知之○兩江總督何桂清等奏浙江軍情喫緊餉源梗阻得旨浙西情形料可無虞惟賊數太眾剿除實難朕與卿等止有敬祈 天佑盡人事以待轉圜也○辛丑諭內閣李孟羣奏擊退金家寨賊匪商城全

境肅清一摺金家寨賊匪與續竄商城之土鎮寨賊黨互相勾結李孟羣派令守備楊光澤等分路進剿該逆兩面拒敵袁懷忠派令守備楊忠等繞出賊後團總湯學銖等起集團勇扼要堵塞該逆驚慌乘霧越嶺逃竄知縣戴鴻經等率勇追擊統計殺賊一千餘名生擒七十餘名此股賊匪由英山羅田竄至商城經李孟羣派兵剿辦該逆窮蹙逃竄斬馘甚多辦理尙爲妥速所有在事出力員弁兵勇准其擇尤保奏○諭軍機大臣等譚廷襄等奏英佛投遞照會並譯呈俄酋來文各摺片均已覽悉俄酋所請兩條如黑龍江分界一節前已諭知譚廷襄等轉諭已欽派奕山在彼相待今普提雅廷欲遣人回黑龍江送信繪圖定議儘可允准但告以從前節次耽延皆因爾國不守往年興安嶺分界成議強欲移我江左居民於右岸以致日久無成今爾旣肯繪圖定議但能一

秉公道彼處大臣斷無不從公勘辦之理惟由旱路走恰克圖豫備槍礮一層當妥爲阻止一則由內地行走中間經過蒙古地方彼處人多愚直恐其別生枝節一則槍礮等項無須代爲備辦中國從不與各國海外爭鋒軍器亦尙可恃彼肯從中說合卽見和好之誼無庸更助兵械總令其仍由海道行走較之旱路回國轉形穩速至通商一節前令俟各國定議後再爲奏請譚廷襄等不妨卽爲允准告以業經奏准惟英佛米三國請添口岸均未准行爾若驟添五口則合之恰克圖等三口已成八處設他國藉口要求無可折服見在大皇帝諭旨准爾於五口之中選擇兩口其道遠而貿易無多者自可不必此非中國吝惜當能體諒此意看其擇定何處卽行奏聞如必以爲未足卽三口亦尙可允許也至英佛所投之文昨諭令告知俄米轉諭勒限繳還廣東省城如逾限

不交卽一面封關一面興兵諒譚廷襄等接到後當卽告知俄米
轉向述知如英佛藉此作轉圜之計則便宜行事之說亦未必再
提如必欲回文可先告俄米屬爲轉達再行文覆之告以從前耆
英等在廣東會奉 先朝諭旨許其便宜行事或因道路遙遠往
返需時然耆英等仍事事具奏並非專擅施行中國旣無此官銜
以後廣東厯任欽差大臣亦無便宜行事之稱何以仍能辦事卽
如咸豐四年崇綸奉派赴津與英米二使相見何嘗有便宜行事
之名目而豁免欠稅等條皆爲之入奏仰邀允准何以於此次欽
差心存藐視所有應辦事宜已託俄米二國轉說旣不來見亦毋
庸勉強此處本非通商口岸向來議事原在廣東爾等違約興兵
本屬無理因俄米兩國代爲說合特命大臣一併接見今爾等心
存輕視本大臣卽據實具奏任爾仍往廣東聽候查辦至譚廷襄

等慮其乘潮闖入內河如仍止遊駛於我無傷設或先開槍礮則我之回擊爲有詞務使釁端勿自我開諒彼知我有備必不敢狡焉思逞也將此由五百里諭知譚廷襄崇綸烏爾棍泰並傳諭錢忻和知之○壬寅諭內閣四月初四日 常雩大祀朕因骭疾尙未如常恐升降拜跪不足以昭誠敬著派恭親王奕訢恭代行禮初一日初二日在禁城內齋宿初三日在 壇內齋宿此次大祀朕雖未能親詣仍於初一日進宮在養心殿敬謹致齋以嚴對越○諭軍機大臣等譚廷襄等奏夷務似有轉機將酌擬辦理各條分別開單請旨一摺前因譚廷襄等將俄夷轉述佛夷所請各款開單呈覽業將減稅一節尙屬可行其餘各條均應議駁諭令該督等遵照辦理此時俄酋因巴拉第等可以見面深爲感激願爲勸諭英佛並求將所議之事分別准駁勿再遲延自應乘勢利導

詳閱單開各條內佛夷所求諸款著譚廷襄等仍遵前旨辦理其英夷各款除償付軍需經費及詣京遊歷各省兩條業經該督等議駁其賠補焚燒既未准佛夷所請英夷事同一例應毋庸議至所稱准進粵城一條從前和約內載有十二年後量爲變通之語原許屆期斟酌此時果能交還廣東省城則將來該酋回粵當諭令新任督臣酌量情形辦理其五口外請添口岸一條五口通商載在和約若因其暗中業已交易輒許增添殊恐將來漫無限制且此條於佛夷未經議准自未便於英夷復爲允許惟增減貨物稅則一條既允佛夷所請英夷應一律辦理其傳教夷人之在內地犯法者送交各口領事查辦載在和約亦應永遠遵照著譚廷襄等卽將分別准駁之處與以照覆米酋國書旣已准其呈遞餘如有所懇請著與英佛一體辦理至俄夷所請勘定界址及五口

通商兩款該督等接奉昨日諭旨後諒已妥爲照覆也將此由五
百里諭知譚廷襄崇綸烏爾棍泰並傳諭錢忻和知之○諭本日
復據譚廷襄等奏二十四日寄信諭旨已經奉到將米夷所求各
款原文呈覽等語米夷通商事宜原與各國相同茲閱所請各條
未免另生枝節此時量予採擇如添設貿易港口一條五口通商
載在和約永遠遵行是以前諭不准議添始有減稅之說今該督
等不能拒絕復據所求入奏豈能邀准必不得已於閩粵兩省附
近通商海口之地酌加小口各一處亦須諭知該兩省督撫查勘
妥協方能辦理此外概無庸議又請計噸納鈔一條據稱該國丈
量船身以四十尺爲一噸他國則以五十尺爲一噸故該夷所納
船鈔較重大朝撫馭外夷一視同仁該國納鈔較重自可許其酌
減以歸一律仍聽候飭令兩廣總督查明通飭五口一體遵行其

所請建立塔表等事並無成例應毋庸議又中國民人傳習天主教不爲非者本爲例所不禁亦毋庸議至於彼處大臣駐紮京師及文移等直達禮部內閣等條向來無此體制屢經諭知該督等不能准行矣其賠償銀兩一條該國被劫被焚船貨等物均應於失事之時遵照和約所載辦理爲日既久豈能逐款清理亦應駁斥至傾鑄銀餅一條中國向用紋銀銀餅本非所重禁止鴉片煙及騙誘民人出口兩條均係地方官應辦之事無俟聲請以上就各款分別准駁卽著譚廷襄等與以照覆並詳加開導所有添設口岸一層將來查辦准行後英佛准其一律通商不准另請他口其前此允准增減稅則各國均當覈辦况米夷恭順自應照辦以符和約內一體均霑利益之語種種通融加惠卽係和約內所謂十二年後變通之事該夷所稱諸條酌議以後再將條約內應修

各款修正之處實屬過事要求該督等惟當據理駁斥仍照前旨要約四月內完結廣東之事不得逾約俄夷所請五口通商之處著不必再與計較卽准其與各國一體貿易惟旣屢次加恩所有黑龍江查勘界址一層必當秉公查辦前諭亦經詳述該督等務與普提雅廷言明從此益敦和好儻米英佛等再有要求之處必當正言拒絕是爲至要將此由六百里諭知譚廷襄崇綸烏爾棍泰並傳諭錢忻和知之○諭邵燦等奏進攻圩賊獲勝徐宿情形喫重請飭德興阿撥兵援剿一摺搶首趙皓善等踞圩抗拒互爲犄角經伊興額等連日攻剿斃賊甚多該匪被創之後意圖報復糾合賊眾在宿州附近一帶肆行搶掠並分股竄擾徐州之接家橋及靈璧縣屬時村等處自應趕緊撲滅以靖地方惟德興阿見在攻擊九洲等處賊匪正當喫緊之際又因江南大營分兵援

應浙東已由該大臣抽撥兵勇二千名前赴江南助剿是江北存
營兵勇爲數無多斷難再行調撥著邵燦等酌度情形如宿州西
境賊情稍鬆卽飭伊興額史榮椿帶兵東剿本日據英桂奏鹿邑
竄匪業經剿散見飭德楞額統帶所部駐紮皖境交界處所會同
朱連泰不分畛域相機攻剿等語此時徐州等處賊勢猖獗自當
先其所急著英桂卽飭德楞額朱連泰迅撥兵勇與徐州官軍互
相聯絡合力進剿務須淨掃賊氛毋令滋蔓將此由六百里各諭
令知之○予廣東陣亡知縣胡國逵等祭葬世職○癸卯以捐貲
團練永廣河南沈邱縣學額三名○甲辰諭軍機大臣等福興奏
連日獲勝並防守各路情形一摺逆匪竄撲衢城於東西南三面
分布賊營意圖圍困雖經福興督飭各軍於東北兩路連獲勝仗
而附城一帶賊勢尙多江山之賊復分投擾及常山該處如何設

備開化玉山亦當兼顧見在周天受江長貴均已馳抵衢州明安泰一軍亦計日可到該將軍復調參將劉芳貴所帶兵勇千餘人赴衢兵力已厚郡城可保無虞惟賊匪尙踞近城地方連次勝仗總未遠退仍屬可慮必當奮力攻剿進克江山以免旁竄周天受江長貴久歷戎行當此賊勢猖獗必能痛加剿洗饒廷選防守三衢是其專責前此退紮玉山不能力遏賊鋒若再不知奮勉自問當得何罪明安泰帶兵赴浙聞其道過常州領餉幾致釀成事端著福興傳諭該總兵將所帶兵勇嚴加約束以肅戎行福興等布置定妥卽著分投攻剿以保浙疆而全大局毋得曠日持久致有疏虞自干重咎將此由六百里諭知福興並傳諭總兵周天受江長貴明安泰饒廷選知之○軍機大臣彭蘊章等會同戶部議奏東河鈔票酌改錢鈔成數得旨依議河工撥款旣加實銀一成自

應撙節支放究其本惟在地方官實收民鈔一面開設官號認真辦理則河工放款或可稍增成數不至折耗過甚該河督巡撫勿徒坐享其成不肯獨任其難迅速妥籌補救之方懷之○再展五城煮賑一月○乙巳諭軍機大臣等何桂清奏衢州之賊日聚日多並探報常山失守開化縣之華埠鎮已有賊蹤又有從浦城江山分竄遂昌之謠情形萬分喫緊雖昨據福興奏衢城連獲勝仗已飭該將軍等布置定妥卽行分投攻剿而賊勢既眾要隘又多兼恐所調兵勇未必盡能得力見在常山開化等處是否各有準備晏端書務當悉力調度毋有疏虞至蘇省所需兵餉已屬浩繁再令協濟浙省勢難久持著晏端書督同司道通籌全局於錢糧等款迅速催提以資接濟其杭嘉湖甯紹數府完善之區應如何設法勸捐或捐借並行亦著該撫督飭地方官會同紳董妥爲籌

辦俾餉糈有著不至專恃鄰省遷延貽誤至江南功在垂成兵力固難再分然衛防設有鬆勁東南大局攸關已諭和春等萬一浙中緊急止可再撥勁旅赴援保浙省卽以保江南著該撫酌度情形咨商辦理將此由六百里諭令知之○諭何桂清奏衢州賊勢蔓延江浙餉源堵塞一摺衢州竄逆屢剿未退江山未復探聞常山復失並有分擾遂昌之語此次賊勢甚眾周天受等力扼東北福興督飭饒廷選守禦府城能否擊退尙無把握江南正在圍攻金陵前已分撥明安泰一軍赴衢援應自難再撥惟浙省應防要隘甚多一有疏虞則賊黨順流而下不獨杭嘉湖各郡無險可守卽蘇常亦朝發夕至東南大局將不可問設或衢州兵勇不敷堵截事在緊急著和春等再派得力鎮將酌帶勁旅救援保浙省卽以保江南腹地務當權其緩急通籌辦理爲要至金陵賊勢漸衰

見在官軍合圍布置已周著和春等激勵將士迅速攻取拔此堅城則餘賊聞風膽落並可分兵籌剿他處實深盼切何桂清奏請飭浙撫自籌軍餉不得專恃江南協濟等語已諭晏端書設法措置於完善各郡捐借並行以資接濟何桂清仍當不分畛域維持全局是爲至要將此由六百里諭令知之○譚廷襄等奏俄人請求各款已允其五口通商乃於分界一層又欲以黑龍江烏蘇哩河綏芬河爲界不肯遵興安嶺舊約輒稱他國之事從此不管擬少緩再爲理諭奏入 上是之